



JORNAL

do

Parlamento Nacional

VI. LEGISLATURA

1.ª SESSÃO LEGISLATIVA (2023-2028)

REUNIÃO PLENÁRIA DE 31 DE JULHO DE 2023

Presidente: Ex.^{ma} Sr.^a Maria Fernanda Lay

Vice-Presidentes: Ex.^{mos} Srs. Maria Teresinha da Silva Viegas e
Alexandrino Afonso Nunes

Secretária: Ex.^{ma} Sr.^a Virgínia Ana Belo

Vice-Secretárias: Ex.^{ma} Sr.^a Bendita Moniz Magno

SUMÁRIO

Sr.^a Presidente loke sessão plenária ne'e iha tuku 9 liu minuto 16 dadeer no halo leitura ba agenda serbisu loron ne'e nian.

Antes da ordem do dia – Leitura ba carta justificação falta Deputada Maria Angélica Rangel da Cruz dos Reis no mós leitura ba anúncio kona-ba composição mesa delegação Timor-Leste nian ba UIP no Grupo Nacional ba AP-CPLP.

Tuirmai, Comissão F, liuhusi ninia Relatora, Deputada Maria Teresa da Silva Gusmão, no ninia Secretário, Deputado Leandro Lobato, hato'o relatório kona-ba fiscalização Comissão nian iha Hospital Nacional Guido Valadares, Laboratório Nacional da Saúde no bá SAMES, I.P.

Iha intervenções diversas, Sr.^a Deputada no Sr. Deputado sira aborda kona-ba: abandono construção

ponte Lamara iha município Manatuto; preço necessidade básica ne'ebé sa'e maka'as iha mercado; contrato husi funcionário sira iha Ministério da Administração Estatal ne'ebé IX Governo hapara; agressão física ne'ebé desconfia halo husi membro F-FDTL balu hasoru jovem sira RAEOA; qualidade no progresso husi construção ponte Bitopo ho Noetopo nian iha RAEOA; condição estrada husi Lospalos ba Tutuala nune'e mós husi Tutuala ba praia de Valu, ne'ebé precisa manutenção; necessidade atu Governo harii filafali Uma Lisan Kaduak iha Lautém; projeto barak ne'ebé parado tanba Governo hapara técnico sira iha PNDS; dificuldade ba ema estrangeiro sira atu hetan cidadania Timor-Leste nian maske sira kaben ho timoroan no iha ona oan no bei-oan; obra construção nian sira iha Oe-Cusse ne'ebé abandonado hela, inclui edifício Autoridade ZEESM ninian; necessidade atu Parlamento halo inquérito parlamentar ba projeto sira iha Oe-cusse, inclui ba destacamento funcionário sira husi programa APS nian iha departamento sira; caso ema estrangeiro sira sai fali na'in ba rai; problema hirak ne'ebé inan sira hasoru durante sira isin-rua; foos folin ne'ebé sa'e maka'as iha mercado; importação tomate husi NTT, ne'ebé hamate produção tomate rai-laran; necessidade atu fó bolsa de estudo ba médico sira iha HNGV hodi hasai especialidade iha rai-li'ur; execução orçamento HNGV nian ne'ebé ki'ik tebes, inclui mós execução SAMES, I.P. nian no problema falta ai-moruk iha hospital sira; polémica kona-ba problema professor contratado sira-nian; abandono obra construção ponte mota Lamara iha Natarbora no mós ponte iha Fatuberliu; Diretor Serviço Notariado município Manufahi nian ne'ebé la hela permanente iha município ne'e; sosa reagente ne'ebé la iha qualidade; falta ai-moruk iha HNGV; caso infeção respiratória aguda ne'ebé nia número sa'e maka'as iha Timor laran; vendedor sira halo manipulação sasán folin iha mercado; autor ba caso homicídio iha Elemloi Delta no iha iha Dare ne'ebé PNTL seidauk captura; abandono obra construção estátua saudoso veterano

Mateus Sinarai da Costa iha suco Bauró Lospalos nian; negociante chinês sira halo uma desorganizado iha dalan protocolo Díli laran; atividade comercial ne'ebé halao husi labarik menoridade sira; estudante menoridade sira ne'ebé consumo álcool no fuma tabaco; necessidade atu autoridade local sira controla comunidade sira ne'ebé usa bee estraga de'it; assédio sexual ne'ebé halo husi docente ida ba ninia estudante universitária ida; mau comportamento estudante sira-nian iha escola pública sira; atraso pagamento husi companhia CCT no ACT ba agricultor café nian sira; atraso iha pagamento bolsa mérito nian ba beneficiário sira iha município Ermera; insuficiência facilidade no sala baixa ba paciente sira iha HNVG; prestação serviço médico sira-nian; visita husi comunidade chinesa sira ne'ebé hela iha Austrália mai Timor-Leste; necessidade atu Governo hapara jogo sira iha município; intervenção AIFAESA, I.P. nian ba vendedor sira iha mercado Taibessi; falta sinais trânsito iha área Palácio Governo bo mós Parlamento Nacional nian; necessidade atu Governo estabelece fatin apropriado ba paciente moras mental sira; medicamento sira husi China ne'ebé ninia rótulo iha de'it china nia lian; preocupação to'os na'in sira-nian relaciona ho importação tomate husi rai-li'ur; atraso iha pagamento subsídio idoso sira-nian; necessidade atu Governo mantém projeto sira ne'ebé la'o hela; fortalecimento institucional husi perspectiva força de trabalho; falta lei atu regulariza construção edifício sira iha Timor laran; paciente sira ho moras grave ne'ebé labele bá consulta iha rai-li'ur tanba la iha despacho husi Ministra Saúde nian; necessidade atu halo fiscalização ba Direção Farmácia nian iha Ministério Saúde relaciona ho orçamento ne'ebé previsto ba sosa reagente; dívida pública ne'ebé sai nafatin preocupação Governo nian; condição husi estrada Manatuto bá Natarbora, bá município Manufahi no mós ba município Viqueque; falta rede telemóvel Telkomcel no Timor Telecom nian iha área Natarbora no Fatuberliu; saudoso Sebastião Gomes nia

aman ne'ebé internado iha HNGV no precisa doação ran ho tipo o+; confronto entre jovem sira iha Bekaeh, suco Lahane Oriental; veterano sira-nian osan fulan ne'ebé cada fulan ko'a 30 USD; estudante timoroan sira iha rai-li'ur ne'ebé sira-nia passaporte mate; aldeia barak seidauk hetan acesso ba eletricidade; necessidade atu acelera obra construção estrada husi Lariguto ba Viqueque; motorista transporte público sira barak mak la viola regras semáforo nian; possibilidade halo lei cibernética hodi regulariza uso redes sociais.

Ikusmai Vice-Ministro dos Assuntos Parlamentares (Adérito Hugo da Costa) hatán ba questão hirak ne'ebé Deputado sira foti.

Sr. Deputado sira ne'ebé intervém mak: José da Cruz, Sância Florência Paixão Bano (FRETILIN), Albino da Silva (CNRT), Mariquita Soares (FRETILIN), Natalino dos Santos (CNRT), David

Dias Ximenes «Mandati» no Cristina Yuri Rebelo dos S. Costa (FRETILIN), Cedelízia Faria dos Santos (CNRT), Antoninho Doutel Sarmiento (FRETILIN), Gabriel Soares (CNRT), Luís Roberto da Silva (KHUNTO), Joaquim dos Santos no Florentino Ximenes da Costa «Sinarai» (FRETILIN), Mateus da Cruz de Carvalho (CNRT), Verónica Fernandes (FRETILIN), Marcos Soares Martins (CNRT), António da Conceição «Kalohan» (PD), António Verdial de S. Ferreira (KHUNTO), Lídia Norberta dos Santos Martins (FRETILIN), Sancha Margarida Tilman (PD), Antoninho Bianco (FRETILIN), Firmínio Taequi no Maria Gorumali Barreto (CNRT), Maria Angélica Rangel da C. dos Reis (FRETILIN), Olinda Guterres (KHUNTO), Dário Madeira (FRETILIN), Domingos Augusto «Deker» (CNRT).

Sr.^a Presidente taka sessão plenária ne'e iha tuku 13.

Sr.^a **Presidente**: — Bom dia Srs. Deputados.

Muitíssimo obrigado por terem vindo. Muito embora liu 17 minutos, ainda está na hora tolerável.

Horas hatudu tuku 9 liu minuto 16.

A reunião da plenária da segunda-feira do dia 31 de julho de 2023, ha'u husu agenda ida atualizada, ne'ebe kaer ida atualizada, ida seluk ne'e bele soe tiha.

Período de Antes da Ordem do Dia: 1. A justificação da falta da Sr.^a Deputada Maria Angélica Rangel da Cruz; 2. Anúncio da composição das mesas da delegação da União Interparlamentar e do Grupo Nacional à Assembleia Parlamentar da CPLP; 3. Apresentação do Relatório de Fiscalização ao Serviço Autónomo de Medicamentos e Equipamentos de Saúde, Instituto Público (SAMES, I.P), Hospital Nacional Guido Valadares, Laboratório Nacional de Saúde, realizada pela Comissão da Saúde, Segurança Social e Igualdade Género, a Comissão F; 4. Declaração política da Bancada Parlamentar do KHUNTO; – ha'u espera katak pronto atu hato'ó – 5. Intervenções diversas dos Srs. Deputados; 6. Intervenção do Sr. Vice-Ministro dos Assuntos Parlamentares sobre as questões suscitadas pelos Srs. Deputados.

Iha Período da Ordem do Dia, anúncio da abertura do prazo de apresentação de candidaturas à eleição – ne'ebé marca ba dia 14 de agosto 2023 – de três membros para o Concelho Superior de Defesa e Segurança e cinco membros para o Concelho do Estado nos termos do artigo 191.º do Regimento do Parlamento Nacional.

Iha nota ne'e hatete katak «As candidaturas são apresentadas até ao final da reunião do Plenário do dia 7 de agosto 2023», ne'ebe, husu ho respeito tomak ba bancadas parlamentares atu tau-matan, tanba Sr. Presidente da República mós husu ona assunto rua ne'e.

Hodi nune'e ha'u fó kedas ba Sr.^a Vice-Secretária para lê hela justificação de faltas. Faz favor.

Sr.^a **Vice-Secretária da Mesa** (Maria Teresa da Silva Gusmão): — Bom dia, Sr.^a Vice, e obrigada.

«Requerimento de justificação de falta.

Ex.^{ma} Sr.^a Presidente do Parlamento Nacional,

Maria Angélica Rangel da Cruz dos Reis, Deputada ao Parlamento Nacional, pertencente ao Partido da FRETILIN, vem requerer a V. Ex.^a que se digne considerar justificadas as faltas dadas a reunião de Plenário e Comissão nos dias 10 de julho e 13 de julho 2023 por motivo de trabalho político, o que faz nos termos e para os efeitos previstos nos artigos 8.º, n.ºs 1, alínea b), 2 e 3, e 5.º, n.º

2 da Lei n.º 5/2004, de 5 de maio, e do artigo 10.º n.º 1 alínea e) do Regimento do Parlamento Nacional, publicado no *Jornal da República* Série I n.º 40, de 11 de novembro de 2009.

24 de julho 2023,

A Deputada Maria Angélica Rangel da Cruz.

Obrigada.

Sr.ª **Presidente**: — Muiíssimo obrigada, Sr.ª Deputada Secretária. Tuirmai, bele lê kedas anúncio da composição ba UIP ho AP-CPLP. Halo favor.

Sr.ª **Vice-Secretária da Mesa** (Maria Teresa da Silva Gusmão): — Obrigada, Sr.ª Presidente.

«Parlamento Nacional de Timor-Leste, Grupo Nacional AP-CPLP.

Sua Excelência Presidente do Parlamento Nacional, Sr.ª Maria Fernanda Lay

Data: 26 de julho de 2023

N.º :38/1.ª/VI/2023/GN-AP-CPLP

Assunto: Composição da Mesa do Grupo Nacional da AP-CPLP.

Excelência,

Tenho a honra de comunicar à Vossa Excelência que foi realizada a eleição para a mesa do Grupo Nacional, junto da Assembleia da Comunidade dos Países da Língua Portuguesa – AP-CPLP, que obteve a seguinte composição: Presidente, Deputada Maria Teresinha Viegas; Vice-Presidente, Deputada Nurima Ribeiro Alkatiri; Secretária, Deputada Sancha Margarida Tilman.

A integração dos Deputados nas comissões da Assembleia Parlamentar consta no documento em anexo.

Queira aceitar, Sr.ª Presidente, os protestos da minha mais elevada consideração e estima.

A Presidente do grupo, Deputada Maria Teresinha Viegas.»

«Grupo Nacional à União Interparlamentar de Timor-Leste.

A Sua Excelência Presidente do Parlamento Nacional, Sr.ª Maria Fernanda Lay.

Data: 24 de julho de 2023

N.º: 2/I/VI/2023, Grupo União Interparlamentar.

Assunto: envio da data de constituição da mesa do Grupo de Timor-Leste à União Interparlamentar da VI Legislatura.

Excelência,

O Grupo de Timor-Leste à União Interparlamentar da VI Legislatura apresenta os seus melhores cumprimentos a Vossa Excelência e tem a honra de remeter, para os devidos efeitos, a ata da constituição da mesa do Grupo Parlamentar de Timor-Leste à UIP para o período de 2023 a 2028, que

foi aprovada com 5 votos a favor, 0 contra e 1 abstenção. Mais se informa que a primeira reunião ordinária se realizou na terça-feira, 12 de julho de 2023.

Segue-se, em anexo, a data da reunião, a lista de presenças e a lista dos candidatos.

Em nome do Grupo da União Interparlamentar subscrevo-me com elevada estima e consideração.

A Presidente do Grupo de Timor-Leste, Sr.^a Deputada Veneranda Lemos Martins».

Proclamação dos resultados.

A Presidente temporária, Deputada Veneranda Eurico Marques Lemos Martins, proclamou o resultado das votações, anunciando em seguida que a lista única para os cargos de mesa do Grupo foi eleita com 5 votos a favor, 0 voto contra e 1 abstenção.

Não havendo mais assuntos a serem tratados e não havendo questões dos Deputados, a Presidente temporária deu por encerrada a reunião às 15h50.

Para constar, lavrou-se a presente ata que, depois de lida, vai ser assinada pela Presidente em exercício, respetivamente pela Secretária eleita.

A Presidente, Deputada Veneranda Eurico Marques Lemos Martins, e a Secretária, Deputada Carminda Carlota».

Obrigada.

Sr.^a **Presidente**: — Srs. Deputados, ha'u la hatene relatório fahe hotu ona ka lae, ida Comissão F nian.

Está a ser distribuído, hodi nune'e ita bá kedas apresentação Relatório de Fiscalização ao Serviço Autónomo de Medicamentos Equipamentos de Saúde, Instituto Público (SAMES, I.P.), Hospital Nacional Guido Valadares e Laboratório Nacional da Saúde, realizada pela Comissão da Saúde, Segurança Social e Igualdade de Género.

Ne'ebe, ha'u entrega ba Sr.^a Presidente da Comissão ho Relatora atu mai hato'o. Halo favor.

Ponto de ordem, um minuto, Sr.^a Deputada Olinda Guterres.

Sr.^a **Olinda Guterres** (KHUNTO): — Di'ak, la to'o um minuto, Sr.^a Presidente.

Bom dia ba Ita-Boot, ba colega Deputado sira no mós Secretária da Mesa.

Sr.^a Presidente, loron ruma, ema tuur iha Ita-Boot nia sorin quando lê, pronuncia halo didi'ak ema nia naran, e pronuncia ne'e la'ós «ezelência», depois ami tuur iha-ne'e la compreende. Antes tuur iha Ita-Boot nia sorin, tem que lê antes, bem preparado atu lê, ami sira tuur iha-ne'e bele compreende no mós ba ema seluk. Labele de repente de'it Ita-Boot sira fó ba lê e depois ami iha-ne'e runguranga, ami ladún compreende.

Obrigada.

Sr.^a **Presidente**: — Ha'u husu desculpa ba inconveniência ne'e, maibé ha'u husu para ita tolera. Tanbasá? Ita hotu-hotu la mai husi *background* ne'ebé lê português di'ak, inclui ha'u-nia an, ha'u mós tem que hadi'a. Ne'ebe, ha'u husu desculpa ba inconveniência, para futuro ami sei hadi'a. Tanba ha'u mós iha deficiência iha línguas, ne'ebe, ha'u husu desculpa, Mesa husu desculpa, perdão, ba Sr. Deputado sira hotu, espera katak ami sei la repete iha futuro mai.

Muito obrigada ba correção.

Tuirmai, Sr.^a Presidente da Comissão, halo favor.

Sr.^a **Presidente da Comissão F** (Maria Gorumali Barreto): — Obrigada Sr.^a Presidente.

Bom dia ba Sr.^a Presidente Parlamento Nacional no mós composição Mesa, ba distinto e distinta Deputado sira hotu no mós ba audiência tomak ne'ebé participa iha Plenária ida-ne'e, ha'u-nia respeita tomak ba Ita-Boot sira hotu.

Tuirmai, ami husi Comissão da Saúde, Segurança Social e Igualdade de Género, Comissão F, ne'ebé hala'o atividades fiscalização ba iha instituição autónoma tolu, ne'ebé tutela iha Ministério Saúde, hanesan SAMES, I.P., Hospital Nacional Guido Valadares, no mós Laboratório Nacional de Saúde, fiscalização ne'ebé ami hala'o liga mós ho assuntos ne'ebé distinta ho distinto Deputado sira foti iha Plenária sobre *stockout* ai-moruk, condição moras iha Hospital Nacional Guido Valadares no mós ho condição iha Laboratório Nacional, iha-ne'ebé falta reagente.

Atu claro no detalhado liu, continua ho relatório ne'ebé sei apresenta husi relator na'in-rua: ida mak Sr. *Sekretaris* Comissão F nian, depois apoia mós husi Sr.^a *Vice-Sekretaris* Parlamento nian, Deputada Nina.

Ha'u hanoin, tuirmai ha'u continua entrega ba Deputada Nina Gusmão para continua halo leitura ba relatório kona-ba Hospital Nacional Guido Valadares.

Obrigada.

Sr.^a **Relatora da Comissão F** (Maria Teresa da Silva Gusmão): — Obrigada ba Presidente Comissão F.

Atividade realizada, fiscalização Comissão F iha Hospital Nacional Guido Valadares.

A. Informação sira ne'ebé recolha iha reunião mak hanesan tuirmai:

- Husi Diretor Executivo, Dr. Alito Soares

1. Hospital Nacional Guido Valadares nu'udar hospital ba cuidado saúde terciário, maibé presta mós atendimento ba cuidado saúde secundário (simu paciente sira ne'ebé transfere husi hospital regional Baucau, hospital *referral* Maliana, hospital *referral* Maubisse, hospital *referral* Suai no

RAEOA), no cuidado saúde primária, (simu paciente sira ne'ebé transfere husi centro saúde sira iha Díli, Ataúro, Manatuto, Liquiçá, Aileu no Ermera).

2. Hospital Nacional Guido Valadares nia equipa gestão maka:

- i. Diretor Executivo, Dr. Alito Soares;
- ii. Diretor Serviço Clínico, Dr. Marcelino Correia;
- iii. Diretor Enfermagem, Sr. Jony Silva;
- iv. Diretor Administração, Finanças no Logística, Sr. Raul Gama;
- v. Diretora Apoio Técnico Diagnóstico no Terapêutico, Dr.^a Mingota Herculano.

Hospital Nacional Guido Valadares iha Departamento hamutuk 16.

3. Recursos Humanos.

Funcionários hamutuk 1577, composto husi funcionário permanente 817 no funcionário contratado 701; equipa médica Brigada Chinesa hamutuk 12 no equipa médica Brigada Cubana hamutuk 47; médico hamutuk 249, ne'ebé composto husi 113 médicos especialistas, timoroan hamutuk 63; enfermeiros hamutuk 557, parteiras hamutuk 108 no técnicos aliados hamutuk 184; pessoal administrativo hamutuk 24; pessoal segurança no pessoal de limpeza hamutuk 220.

4. Ba apoio diagnóstico no internamento.

Apoio diagnóstico iha modalidade rua ne'ebé essencial tebes: radiologia, mak *MRI (Magnetic Resonance Imaging)*, *CT Scan*, etc., no laboratório, halo teste diagnóstico básico no diagnóstico avançado.

Iha especialista na'in-lima ba radiologia ne'ebé iha habilidade atu halo diagnóstico no interpretação ba resultado diagnóstico.

5. Internamento.

Inicialmente iha cama 150, maibé hetan aumento gradual no atualmente iha total cama 446. Ho volume paciente ne'ebé boot, HNGV sei enfrenta nafatin problema iha espaço ba internamento.

6. ICCU (*Intensive Cardiology Care Unit*).

Iha cama hamutuk 11. Estabelecimento ne'e destinado ba internamento paciente sira ho moras cardíaco.

7. ICU (*Intensive Care Unit*).

Iha de'it cama neen, cama lima utiliza ba internamento caso crítico ka grave, hanesan cirurgia, pediatria, etc., no cama ida reserva ba paciente ne'ebé ho moras contagiosa no precisa halo isolamento.

8. Moras comum.

Ida, tipo moras ne'ebé regista transferência ba estrangeiro aas mak moras cardíaco, cancro no hemodiálise ka fase-raan.

Hemodiálise, iha tinan lima ikus, la efetua ona transferência paciente ba estrangeiro tanba iha ona recursos humanos ne'ebé qualificado. Além de ne'e iha mós equipamento médico ne'ebé suficiente, agora iha máquina hemodiálise hamutuk 14.

Moras cardíaco, bele halo diagnóstico iha HNGV, maibé intervenção médica tem que halo iha Indonésia, Malásia no Singapura. Regista ona redução iha número transferência ba estrangeiro tanba diagnóstico bele halo iha Hospital Nacional Guido Valadares.

Moras cancro, iha fulan-junho estabelece ona Centro Oncologia, nune'e paciente ne'ebé precisa halo diagnóstico contínuo ba quimioterapia bele halo iha Hospital Nacional Guido Valadares. Hospital Nacional Guido Valadares sei continua serbisu hamutuk ho SAMES I.P. atu assegura disponibilidade ai-moruk no consumíveis médicos ba quimioterapia nian.

9. Cada loron, máximo regista paciente 400 no mínimo paciente 100. Número internamento cada loron mínimo paciente 45.

Iha tinan 2022, Hospital Nacional Guido Valadares regista atendimento paciente iha emergência hamutuk 55 965.

10. Prioridade.

Estabelecimento apropriado ba paciente ho moras mental, expansão infraestrutura ba unidade cuidado saúde sira ne'ebé existe ona, no reforça formação contínuo ba recursos humanos no halo recrutamento conforme Hospital Nacional Guido Valadares nia necessidade.

11. Taxa mortalidade sei aas tanba dala barak paciente sira ne'ebé mate iha Hospital Nacional Guido Valadares maka paciente sira ne'ebé transfere husi facilidade saúde sira seluk.

12. Orçamento ne'ebé aloca iha item «Prémios, condecorações e ofertas», ho montante hamutuk 5000 USD, destinado ba emissão certificado no compra lembrança ba Brigada Chinesa no Brigada Cubana sira bainhira remata sira-nia missão iha Timor-Leste.

13. Bainhira atu efetua transferência paciente ba estrangeiro maka paciente la iha passaporte, Hospital Nacional Guido Valadares, liuhosi coordenação ho Ministério da Justiça, facilita obtenção ba passaporte.

Tipo procedimento ba obtenção passaporte iha oin rua:

1. Paciente ho categoria transferência normal, processo emissão passaporte ho duração máxima semana rua.

2. Paciente ho categoria transferência emergência, processo emissão passaporte ho duração entre loron tolu to'o lima.

Dala ruma regista atraso iha transferência ba estrangeiro, ho razão paciente la iha documento sira, hanesan cartão eleitoral, bilhete identidade no passaporte.

- Apresentação husi Diretora Direção Apoio Diagnóstico no Terapêutico, Dr.^a Mingota Herculano.

1. Direção Apoio Diagnóstico no Terapêutico iha departamento neen, mak hanesan tuirmai: Farmácia; Radiologia; Laboratório; Banco de sangue; Fisioterapia; Nutrição.

Husi departamento hirak-ne'e departamento sira hanesan Farmácia, Laboratório no Banco de Sangue maka sempre hetan reclamação relaciona ho disponibilidade ai-moruk, reagente, consumíveis no raan.

2. Departamento Farmácia.

Sempre halo quantificação anual ba ai-moruk sira ne'ebé Hospital Nacional Guido Valadares precisa ba tinan ida nia laran baseia ba utilização iha tinan anterior. Problema *stockout* iha tinan 2022 no tinan 2023 regista 16% to'o 18%.

Iha pedido ho tipo tolu: pedido regular, – mak halo pedido baseia ba dados utilização fulan anterior – pedido extraordinário no pedido emergência.

3. Departamento Laboratório.

Halo qualificação anual ba reagente sira ne'ebé Hospital Nacional Guido Valadares precisa, maibé simu reagente ne'ebé menos husi total quantificação nian. Problema ida-ne'e contribui ba aumento número transferência paciente ba estrangeiro.

Iha tinan 2021, tratamento ba paciente hamutuk 174 ba estrangeiro, ho custo total tokon 11 dólares.

4. Distribuição ai-moruk.

Iha tinan 2022 acontece inundação, ai-moruk no consumíveis médicos balu hetan estragos. Destruição ba estragos hirak-ne'e hala'o iha lixeira Tibar.

- Tuirmai, apresentação husi Diretor Direção Administração, Finanças no Logística, Sr. Raul Gama.

1. Orçamento Geral do Estado:

Iha Orçamento Geral do Estado 2022, Hospital Nacional Guido Valadares hetan alocação orçamento ho montante tokon 11.1 dólares, ne'ebé distribui ba categoria haat, hanesan tuirmai:

- a). Salários e Vencimentos, ho montante tokon 5.9 dólares;

- b). Bens e Serviços, ho montante tokon 3.9 dólares;

- c). Capital Menor, ho montante 500 000 USD;

- d). Capital de Desenvolvimento, ho montante 762.000 USD.

Execução orçamento iha tinan 2022 maka ho montante tokon 9.9 dólares, ne'ebé corresponde ba 90.8%.

Orçamento Geral do Estado 2023, HNGV hetan alocação orçamento tokon 13.5 dólares, ne'ebé distribui ba categoria lima, hanesan:

- a). Despesas com pessoal, ho montante tokon 7.6 dólares;
- b). Aquisição de bens correntes, ho montante tokon 1.7 dólares;
- c). Aquisição de serviços correntes, ho montante tokon 3.1 dólares;
- d). Transferências correntes, ho montante 8 000 USD;
- e). Aquisição de bens de capital, ho montante 965 090 USD.

Execução orçamento to'o loron 13 fulan-julho tinan 2023, ho montante tokon 4.6 dólares, ne'ebé corresponde ba 39.9%.

2. Direção Administração Finanças no Logística iha departamento neen, mak hanesan tuirmai: Administração, Finanças, Logística, Aprovisionamento, Recursos Humanos, Sistema de Informação.

3. Dívidas eletricidade ne'ebé regista desde 2017 to'o 2020 ho montante tokon 1.2 dólares, to'o agora seidak resolve tanba pacote fiscal ne'ebé atribui ba HNGV la suficiente atu cobre pagamento ba dívida refere.

4. Problema ahi mate ne'ebé dificulta serbisu atendimento iha HNGV, iha fim de 2022, EDTL, E.P. aumenta mós *feeder* VI ba HNGV. Agora daudaun HNGV iha acesso ba *feeder* V no *feeder* VI. Além de ne'e, iha mós gerador tolu ne'ebé iha condição di'ak.

5. Relaciona ho oxigénio ne'ebé la iha qualidade, ne'e responsabilidade SAMES, I.P. nian atu halo controlo, tanba SAMES, I.P. maka halo aquisição. HNGV informa kedas SAMES, I.P. bainhira identifica questão ida-ne'e no SAMES, I.P. halo kedas intervenção.

6. Processo recrutamento ba professional saúde hamutuk 169 agora iha ona Comissão da Função Pública. Recrutamento ne'e destinado ba médicos, parteiras no enfermeiros ba regime geral no ba regime especial. Recrutamento refere ho objetivo atu substitui professional saúde sira-ne'ebé iha ona idade reforma, nune'e mós preenche posição sira ne'ebé atu presta atendimento iha unidade sira ne'ebé halo expansão.

7. Espaço la suficiente atu acomoda paciente ho volume ne'ebé boot tanba paciente sira iha preferência ba consulta no tratamento iha HNGV em vez de bá iha facilidade saúde ne'ebé besik sira-nia hela-fatin. Tanba ne'e, husu ba Ministério Saúde atu tau atenção ba condição recursos humanos, orçamento, infraestrutura no equipamentos médicos iha facilidade saúde sira.

8. Estabelecimento *acute care*, edifício de cuidados intensivos destinado de'it ba fó *counseling*, maibé, tanba la iha condição infraestrutura apropriada, HNGV utiliza estabelecimento refere ba internamento paciente sira ne'ebé ho moras mental.

9. Receitas.

HNGV tau ona iha plano atu apresenta ba Ministério Saúde, ajustamento ba tabela preço. Iha tinan 2023, recolha ona receitas ho valor hanesan tuirmai:

Nível nacional ka Timoroan: 1.º trimestre hahú fulan-janeiro to’o março, ho total 74.817.85 USD; 2.º trimestre hahú husi fulan-abril to’o junho, ho total 70.090.71 USD.

Ba estrangeiro: 1.º trimestre fulan-janeiro to’o março, ho total 29.570.00 USD; 2.º trimestre fulan-abril to’o junho, ho total 24.147.71 USD.»

Tuirmai, como relatório iha tolu kedas, então ha'u hakat liu ba iha parte conclusão.

«Conclusão.

Husi atividade fiscalização ida-ne’e, Comissão F formula conclusão sira hanesan tuirmai;

1. Instalação ba tratamento paciente ho moras mental, edifício *acute care*, edifício de cuidados intensivos, localiza iha Unidade Maternidade nia sorin. Hospital Nacional Guido Valadares la’ós fatin ne’ebé apropriado atu acomoda paciente ho moras físico ho paciente ho moras mental.

2. HNGV enfrenta dificuldades atu halo gestão ho número paciente ne’ebé boot, tanba paciente balu ho moras leve, hanesan constipação, mós bá hotu consulta iha HNGV.

3. Iha tinan rua ikus, tinan 2022 no 2023, HNGV regista *stockout* iha 16% to’o 18%. Percentagem refere dificulta tebes HNGV nia prestação atendimento saúde.

4. HNGV finaliza ona processo recrutamento ba profissional saúde hamutuk 169, maibé sei pendente iha Comissão da Função Pública.

5. Oxigénio, ne’ebé hetan reclamação kona-ba la iha qualidade, la’ós HNGV mak efetua compra, maibé hetan fornecimento husi SAMES, I.P.

6. Sala *ICU* ba bebé foin moris, la iha condição infraestrutura ne’ebé di’ak no falta equipamentos médicos.

7. Maternidade, la iha cama suficiente atu acomoda paciente sira iha sala de espera. Sala partos hamutuk neen de’it no ida-ne’e la suficiente ba volume paciente ne’ebé bloco maternidade atende.

IV. Recomendação.

Recomendação sira ne’ebé Comissão F regista mak hanesan:

Ba Ministério Saúde.

1. Atu tau consideração hodi aumenta alocação OGE ba SAMES, I.P. atu nune’e assegura disponibilidade ai-moruk, consumíveis médicos no equipamento médico sira ba HNGV.

2. Atu tau atenção máxima ba condição infraestrutura, recursos humanos no facilidade sira iha posto saúde, centro saúde no hospital *referral* sira, nune’e paciente sira labele ba hotu iha HNGV.

3. Atu tau plano no prioridade ba construção hospital psiquiátrico ba tratamento paciente ho moras mental, atu nune’e assegura profissional saúde sira bele halo intervenção médica ida-ne’ebé adequada ba paciente.

4. Hadi'a condição infraestrutura no reforça equipamentos médicos ne'ebé sei menos iha sala ICU ba bebé foin moris.

5. Tau prioridade hodi aloca orçamento ho montante tokon 1.2 dólares, hodi selu dívida eletricidade nian ne'ebé desde tinan 2017 to'o tinan 2020 seidauk resolve.

Ba Comissão Função Pública.

Atu tau prioridade ba seguimento processo recrutamento ba professional saúde 169 tanba HNGV aloca ona orçamento ba contratação pessoal hirak-ne'e iha tinan 2023, atu assegura prestação serviço atendimento saúde ne'ebé adequada iha HNGV.

Recomendação ba Instituto Nacional de Segurança Social:

Atu acelera processo emissão cartão segurança social ba funcionário sira, nune'e mós acelera processamento subsídio invalidez nian ba funcionários contratados ne'ebé HNGV submete ba recrutamento.

V. Aprovação relatório.

Relatório fiscalização ne'e discute iha reunião Comissão nian iha loron 26 fulan-julho tinan 2023 no hetan aprovação ho voto a favor 8, contra 0 no abstenção 0.

Relatora, Maria Teresa da Silva Gusmão.

Presidente Comissão, Deputada Maria Gorumali Barreto»

Obrigada.

Sr.^a **Presidente da Comissão F** (Maria Gorumali Barreto): — Obrigada ba Sr.^a *Sekretaris*.

Tuirmai, ami continua ho relatório rua, SAMES, I.P. ho Laboratório Nacional, maibé tanba questão tempo, husu ba distinta no distinto Deputado sira bele acompanha iha relatório ne'ebé distribui ona iha Ita-Boot sira-nia mesa.

Relatora continua nafatin ba iha conclusão ho recomendação husi instituição autónoma rua, ne'ebé sei lê husi *Sekretaris* Comissão F.

Sr.^a **Secretário da Comissão F** (Leandro Lobato): — Ho permissão Sr.^a Presidente Comissão F nian ha'u halo leitura ba relatório, diretamente ba iha conclusão iha página n.º 8, husi relatório SAMES, I.P. nian.

«Conclusão.

Husi atividade fiscalização ida-ne'e, Comissão F formula conclusão sira hanesan tuirmai:

1. Orçamento ne'ebé anualmente aloca ba SAMES, I.P. la tuir orçamento ne'ebé SAMES I.P. prevê iha plano ação anual, ho nune'e SAMES, I.P. sempre enfrenta *stockout*. Iha debate OGE 2023, Deputados Comissão F halo proposta alteração, maibé infelizmente proposta refere não admitido.

2. Ho situação pandemia COVID-19 no crise entre Ucrânia no Rússia ne'ebé afeta ba mudança economia global, liuliu preço sasán iha mercado internacional, nune'e mós preço transporte sasán mai Timor-Leste, precisa aumenta alocação orçamento ba compra ai-moruk no equipamentos médicos hodi bele resolve problema *stockout*.

3. Liuhusi revogação ne'ebé efetua iha Decreto-Lei n.º 22/2022, de 11 de maio, Regime jurídico do aprovisionamento, dos contratos públicos e das respetivas infrações, artigo 193.º norma revogatório, alínea d) ne'ebé cita Decreto-Lei n.º 2/2009, de 15 de janeiro, alterado pelo Decreto-Lei n.º 12/2016, de 11 de maio, dificulta tebes processo aprovisionamento.

4. Armazém central SAMES, I.P. ninia infraestrutura la iha capacidade hodi acumula hotu quantidade ai-moruk no equipamento saúde ne'ebé SAMES, I.P. halo compra, antes halo distribuição ba consumidores iha facilidade saúde sira, iha nível nacional no municipal. Ho limitação infraestrutura iha SAMES, I.P. maka anualmente SAMES, I.P. gasta orçamento 78 000 USD hodi aluga armazém iha Bebonuk.

5. Recursos humanos limitados atu responde ba exigência volume SAMES, I.P. nian no la iha formação contínua hodi capacita funcionário ne'ebé exerce hela função iha SAMES, I.P.

IV. Recomendação.

Baseia ba programa sira ne'ebé Comissão F regista iha fiscalização, recomenda ba Ministério relevante hanesan:

Ba Ministério Saúde

1. Husu Mistério Saúde atu tau consideração ba orçamento ne'ebé prevê iha SAMES I.P. nia plano ação anual, atu nune'e bele assegura disponibilidade distribuição no fornecimento ai-moruk, consumível médico no equipamento médico ba facilidade saúde sira iha território laran tomak.

2. Precisa tau atenção urgente hodi halo alteração ba Decreto-Lei n.º 22/2022, de 11 de maio, Regime jurídico do aprovisionamento, dos contratos públicos e das respetivas infrações, nune'e mós requisito sira ne'ebé dificulta processo aprovisionamento.

3. Falta recursos humanos ne'ebé sai nu'udar limitação, tanba SAMES, I.P. iha de'it 88 funcionários ne'ebé presta serviço iha armazém central, armazém regional Ainaro, armazém regional Baucau no armazém regional Maliana. Iha necessidade urgente atu recruta pessoal ba Departamento Garantia Controlo Qualidade, atubele assegura serviço essencial ida-ne'e.

4. Ministério Saúde precisa tau prioridade ba processo construção edifício foun ho andar tolu, nune'e bele facilita no assegura condição armazenamento ida-ne'ebé adequado ba medicamento no equipamento médico sira, hodi nune'e halo poupança orçamento ba aluga armazém iha fatin seluk.

5. Ministério Saúde precisa promove ação formação ba funcionário hodi aprofunda liután sira-nia conhecimento iha área serbisu.

Aprovação Relatório.

Relatório fiscalização ne'e discute iha reunião Comissão iha loron 26 fulan-julho tinan 2023, no hetan aprovação ho 8 votos a favor, 0 contra e 0 abstenção.»

Ita bá fali iha relatório Laboratório Nacional da Saúde, página n.º 10, ba kedas iha conclusão. «Conclusão.

Husi atividade fiscalização ida-ne'e, Comissão F halo conclusão sira hanesan tuirmai ne'e:

1. Precisa reforça número recursos humanos iha unidade sira no Departamento Toxicologia.
2. Precisa atu tau atenção ba funcionário contratado ne'ebé serbisu liu ona tinan liman iha Laboratório Nacional de Saúde.
3. Precisa investe iha capacitação ba recursos humanos, conforme ida-idak nia área especialidade.
4. La iha condição serbisu ne'ebé adequado ba Unidade Microbiologia, Unidade Parasitologia, Unidade Serologia, Unidade Bioquímica no Unidade Hematologia.
5. Seidauk iha infraestrutura informática adequada hodi apoia serbisu iha Unidade *Genome Sequencing*.
6. SAMES, I.P. fornece reagente ne'ebé la iha qualidade ka la tuir «estandarte» OMS, nomeadamente ba *RPR card test*, *Rapid test HIV* no Hepatite B.
7. Desde tinan 2018 to'o agora Departamento Toxicologia la iha *stock* reagente hodi halo teste ne'ebé apropriado.

Recomendação.

Lihusi atividade fiscalização ida-ne'e, Comissão hakarak recomenda:

1. Condição infraestrutura. Tau prioridade ba construção ka reabilitação edifício Laboratório Nacional da Saúde hodi halo separação ba Unidade Microbiologia, Unidade *Parasitologia*, Unidade Serologia, Unidade Hematologia no Unidade Bioquímica.
2. Precisa cria condição financeira no recursos humanos ne'ebé adequado.

3. Laboratório Nacional da Saúde no SAMES, I.P. precisa melhorar sistema gestão no controlo.
4. Tau atenção no resolve stock reagente ba unidade sira no Departamento *Toxicologia*.
5. Reforça número recursos humanos atu hadi'a prestação serviço.
6. Capacita recursos humanos iha área especialidade sira, liuhusi investe iha estudo ba grau licenciatura no mestrado.
7. Halo revisão ba tabela salarial ba técnico aliado sira ne'ebé serbisu iha laboratório no precisa halo alteração ba categoria técnicos aliados.
8. SAMES, I.P. tau atenção ba aquisição reagente sira tuir standar OMS nian, nune'e mós tau atenção iha aquisição reagente tuir pedido especificação máquina ne'ebé existe iha Laboratório Nacional da Saúde.
9. Tau consideração ba custo manutenção ba máquina no pessoal técnico qualificado iha Unidade *Genome Sequencing*.
10. Tau prioridade atu resolve ho urgência reagente ba máquina AAS, HPLC no spectrophotometer ne'ebé sei la iha iha Departamento *Toxicologia*.
11. Estabelece tabela preço ba companhia internacional sira ne'ebé precisa halo teste iha Departamento *Toxicologia* tanba reagente ba teste ninia folin aas.

Aprovação relatório.

Relatório fiscalização ne'e discute iha reunião Comissão nian iha loron 27 fulan-julho tinan 2023, no hetan aprovação ho 9 votos a favor, 0 contra no 0 abstenção».

Obrigado, Presidente da Comissão F.

Sr.^a **Presidente da Comissão F** (Maria Gorumali Barreto): — Obrigada ba Sr. Secretário.

Sr.^a Presidente, distinta no distinto Deputado sira, ida-ne'e mak relatório fiscalização husi Comissão F ba instituição autónoma tolu ne'e. E, ha'u husu apreciação husi distinta e distinto Deputado sira tanba, se acompanha relatório tolu ne'e, ita bele hetan ona katak problema nia abut loloos ne'e iha parte ida-ne'ebé.

Maibé, ami sei falta fiscalização ida, mak iha Banco de Sangue Nacional no mós Direção Farmácia iha Ministério da Saúde, tanba iha instituição ne'e iha procedimento ka mecanismo ida-ne'ebé iha ligação maka'as ba malu.

Ha'u hanoin, ida-ne'e mak ami-nia introdução, e ami hein Ita-Boot sira-nia apreciação iha intervenção.

Obrigado barak, Sr.^a Presidente.

Sr.^a **Presidente**: — Obrigada ba Sr.^a Presidente da Comissão F ho relatores, mas ha'u atu bolu atenção ba Sr.^a Presidente katak iha norma revogatória ne'ebé ho Decreto-Lei n.º 84/2022, de 23 de novembro, katak Laboratório Nacional da Saúde la existe ona, maibé sai fali Instituto Nacional da Saúde, ne'ebe naran tau iha relatório fiscalização ne'e sala, tem que hadi'a. Ida-ne'e mak ha'u-nia correção.

Tuirmai, Srs. Deputados, ita sei tama ba intervenção, Ita-Boot sira bele aproveita halo mós intervenção ba relatório fiscalização ne'ebé Comissão F hato'o, mas ne'e parte de *iceberg, gunung es*. Ha'u hatete *gunung es* tanba UNFPA (*United Nations Population Fund*) bainhira mai hetan ho ha'u, situação saúde ita-nian preocupante tebes, liuliu ho saúde doenças contagiosas. Ne'ebe ha'u husu atenção ita hotu nian, liuliu ba Comissão Permanente, ba situação ida-ne'e, se bele, serbisu hamutuk ho Ministério da Saúde ho UNFPA no mós instituição sira seluk atu tau-matan para ita *fokus*.

Tuirmai, sei iha declaração política da Bancada Parlamentar do KHUNTO. Halo favor.

Sr. **Luís Roberto da Silva** (KHUNTO): — Obrigado, Sr.^a Presidente Parlamento Nacional.

Excelência, Sr.^a Presidente do Parlamento Nacional, membro da Mesa tomak, Excelência Sr. Vice-Ministro dos Assuntos Parlamentares, caro colega Deputado no Deputada sira, ho respeito tomak ba equipa Rádio no Televisão Parlamento Nacional, mídia nacional no internacional sira hotu, hakuak boot ba povo doben Timor-Leste, dadeer di'ak ba ita hotu.

Tuir comunicado imprensa liuhusi *SM News Timor*, iha loron 17 fulan-julho tinan 2023, ne'ebé fó-sai husi ema balu hanaran an defensora ka ativista iha momento ida-ne'e, hodi hatudu nia posição kona-ba nia liberdade expressão hodi insulta no ameaça líder nacional balu, liga ba assunto ida-ne'e Bancada KHUNTO recomenda atu ativista ka, grupo ka liderança ida-ne'ebé la hatudu respeito hodi hatún ema nia dignidade humana liuhusi mídia social, hanesan *facebook* ka plataforma mídia saida de'it, PNTL tem que captura no processa tuir lei ne'ebé vigora. PNTL bele recorre diretamente ba artigo 189.º Código Penal kona-ba instigação crime, ou bele mós PNTL recorre ba Código Processo Penal iha artigo 211.º n.º 1, kona-ba PNTL bele bele participa qualquer cidadão ida bainhira iha indícios crime. PNTL bele halo identificação kedas iha horas sanulu resin rua nia laran. PNTL mós bele usa poder funcional tuir artigo 56.º n.º 1 husi Código Processo Penal hodi halo atuação sem intervenção husi Ministério Público no sem iha mandato judicial husi tribunal desde que ema ne'e iha indícios comete crime ida.

Iha mós artigo 177.º, artigo 204.º no artigo 243.º Código Processo Penal fó competência ba PNTL katak qualquer expressão ne'ebé contém criminalidade, absolutamente PNTL foti ação kedas

hodi labele husik insulta, difama no ameaça halimar ema seluk, sá tan ameaça fali liderança nacional balu.

Ita mós recomenda ba órgão regulador telecomunicações iha Timor-Leste atu halo *sensor* no bloqueia conteúdo mensagem ne'ebé iha indícios crime, inclui sira-ne'ebé regista ID *Fb* la ho identidade loloos ou ID falso.

Se ação sira hanesan ne'e sei continua existe, ba futuro parte Governo ho Parlamento Nacional bele procede hodi haree didi'ak kona-ba *cybercrime*, ho razão katak la'ós tan de'it ita-nia Constituição RDTL artigo 40.º garante ba cada cidadão atu iha liberdade expressão, ne'e ita atu iha direito absoluta hodi insulta, difama no ameaça ema seluk, ita precisa respeito dignidade cada ema nian.

Ita tem que educa ita-nia sociedade hahú agora, hodi nune'e, maski iha diferença opções políticas, maibé hatene respeita ema seluk, tuir KHUNTO nia lisan «Tane ó Rain, tane ó emar no tane ó lisan». Ita tem que educa ita-nia sociedade kona-ba funções loloos husi utilização mídia social sira-ne'e, tanba tuir dados katak cidadão Timor-Leste ne'ebé acesso ba mídia social sira-ne'e quase 50% tiha ona. Se parte competente la hahú halo ação kedas hodi educa sociedade liuhusi processo criminal ruma ba cidadão sira-ne'ebé livre atu insulta, ameaça, difama ita-nia líder ka cidadão sira, liuliu iha mídia social sira, ba futuro ita hatoman an ona atu sira compreende sala essência husi conceito democracia ne'ebé ita-nia Estado de direto democrático ne'e opta.

Tanba ne'e, husu ba Parlamento Nacional, mai ita hamutuk atubele hanoin didi'ak ba ita-nia cidadão sira-ne'ebé halo insulto, difama ema tuir sira-nia hakarak.

Obrigado barak.

Ha'u-nia declaração to'o ba ne'e de'it.

Sr.^a **Presidente**: — Muito obrigada.

Ha'u taka ona inscrição, tanba 23 Deputados inscritos ba atu halo intervenção ohin dadeer. Hodi nune'e ha'u fó kedas tempo ba Sr. Deputado José da Cruz hodi halo nia intervenção. Bele mós oportunidade ko'alia kona-ba relatório, Ita-Boot nia apreciação. Cinco minutos.

Sr. **José da Cruz** (FRETILIN): — Obrigado, Sr.^a Presidente.

Bom dia, S. Ex.^a Presidente Parlamento Nacional ho composição da Mesa, Excelência Sr. Vice-Ministro dos Assuntos Parlamentares, ilustre caro Deputado no Deputada sira hotu, mídia no povo rona-na'in.

Iha-ne'e ha'u hakarak apresenta de'it situação balu ne'ebé agora la'o daudauk relaciona ho funcionário iha Administração Estatal ne'ebé iha programa PNDS (Programa Nacional do Desenvolvimento dos Sucos) nian, quase que sira hapara hotu ona.

Maibé quando hapara sira, la iha carta ruma ka despacho ruma, verbalmente hapara de'it sira, ida-ne'e ita precisa haree didi'ak. Relaciona ho hapara sira, iha implicação mós ba programa ne'ebé implementa iha tinan kotuk husi Governo anterior, Programa UKL (Uma Kbiit Laek) ne'ebé hodi osan Estado nian mak ita implementa.

Enquanto hapara ona sira, claro que programa sira-ne'e parado, ita-nia preocupação mak ne'e: se hapara ona, programa la la'o, quase que projeto sira-ne'e abandona. Mesmo que iha razão dehan katak mudança de Governo, mudança de programa, maibé ita mós tem que haree oinsá atubele halo gestão para labele fó prejuízo ba Orçamento Estado, porque obra ne'ebé implementa husi Governo anterior, total por volta de onze mil e tal número de uma ne'ebé halo, funcionário sira-ne'ebé hapara por volta de trezentos e cinquenta e quatro. Hirak-ne'e hotu fó implicação tebes ba ita-nia problema social. Será que hirak-ne'e la sai ona prioridade iha IX Governo? Maibé ita mós tem que haree didi'ak, katak implementação projeto UKL sira-ne'ebé *on going* para de'it ka la iha ona vontade atu continua ka husik hela de'it hanesan ne'e?

Ida-ne'e mak ha'u hakarak hato'o iha ha'u-nia intervenção dadeer ida-ne'e, atu nune'e, Excelência, ministro relevante bele haree to'ok assunto ida-ne'e para bele haree didi'ak, porque osan sira-ne'ebé hodi halo obra UKL sira-ne'e mós povo nia osan. Será que hirak-ne'e hotu ita husik hela de'it?

Ha'u hanoin, ida-ne'e mak ha'u-nia intervenção.

Muito obrigado ba Sr.^a Presidente.

Sr.^a **Presidente**: — Tuirmai, Sr.^a Deputada Sância Paixão Bano.

Sr.^a **Sância Florência Paixão Bano** (FRETILIN): — Obrigada ba tempo.

Ha'u-nia respeito ba Sr.^a Presidente do Parlamento Nacional, composição da Mesa, Sr. Vice-Ministro dos Assuntos Parlamentares, distinto Deputado sira no mós rona-na'in povo Timor-Leste.

Ha'u hakarak, iha intervenção ida-ne'e, atu liga ho assunto defesa nian, katak iha semana kotuk iha acontecimento ne'ebé envolve *oknum* ka indivíduo força F-FDTL husi componente naval no terrestres nian iha RAEOA ne'ebé baku jovem no agente polícia ida iha festa laran.

Ha'u hakarak fó ha'u-nia declaração iha-ne'e katak informação ida-ne'e ha'u mós hato'o direta ona ba comandante ka tenente-coronel força defesa refere, katak assunto ida-ne'e hata'uk tebes comunidade sira iha-ne'ebá, tanba jovem sira iha RAEOA nunca hanoin atu halo ka atu iha ação ruma hasoru força sira refere. Então, ha'u hakarak fó ha'u-nia declaração iha-ne'e mós katak husi parte defesa fó licença ka lae ba sira-nia membros balu bele tama iha festa laran usa farda completo no mós lori kilat completo, ba iha qualquer festa. Ha'u husu ida-ne'e atu parte refere bele haree no mós ha'u husu atu equipa investigação bele tun direta atu halo investigação ba ida-ne'e.

Segundo, ha'u hakarak confirma informação balu ne'ebé liga ho ita-nia intervenção iha dia 24 semana kotuk, ne'ebé liga ba ponte Bitopo ho Noetopo nian iha RAEOA, ne'ebé Deputado balu ko'alia katak, «la iha qualidade no mós dehan di'ak liu hapara tiha projeto refere».

Ha'u hakarak informa de'it iha-ne'e katak, iha ponte rua refere, ponte Bitopo atinge ona 62,27% ne'ebé besik hotu, no mós ponte Noetopo iha ona 67%, ne'ebé aloca husi Orçamento Geral do Estado 2020. Ponte rua ne'e constrói husi desenho ponte antiga ne'ebé liga ho ponte Oebaha no Bihala, e ponte ne'e halo iha tempo indonésia ne'ebé tama ona tinan 30, ne'ebé ho condição sei di'ak hela.

Ha'u hakarak esclarece iha-ne'e katak Deputado ne'ebé ko'alia ne'e tem que clarifica informação loloos mak ita ko'alia, se la iha qualidade, atinge por cento balu ne'ebé iha ona, então ha'u mós husu para Comissão E atu halo fiscalização ba assunto refere. Se karik ita hapara, sé mak lakon? Será que ita atu haruka de'it comunidade iha parte RAEOA, liuliu iha área rural, la'o de'it iha mota laran?

Assunto ida-ne'e mak ha'u hakarak ko'alia iha fatin ida-ne'e.

Obrigada barak.

Sr.^a **Presidente:** — Obrigada.

Tuirmai, Sr. Deputado Albino da Silva.

Sr. **Albino da Silva** (CNRT): — Muito obrigado.

Bom dia ba Presidente da Mesa, composição da Mesa, Vice-Ministro dos Assuntos Parlamentares, distintas no distintos Deputados no rona-na'in sira hotu.

Iha-ne'e ha'u lori preocupação husi ita-nia comunidade sira iha parte município Lautém ne'ebá. Bainhira ha'u ba passa ha'u-nia fim-de-semana iha-ne'ebá, ha'u identifica no simu sira-nia preocupação hirak ne'e.

Primeiro, mak estrada ligação Lospalos ba Tutuala, no mós estrada ligação Tutuala ba praia de Valu.

Situação ida-ne'e ha'u levanta ona iha Plenária ida-ne'e semana hirak liubá, maibé to'o agora ladauk iha normalização. Felizmente agora udan laiha, maibé tuir informação husi Serviço Nacional de Meteorologia katak iha fulan rua oin mai ne'e Timor sei hetan ciclone ida, e, karik ida-ne'e acontece, situação iha-ne'ebá estrada ne'e la iha dalan seluk atu halo normalização a não ser iha fatin ne'ebá duni. Se kotu, movimentação população iha-ne'ebá la bele halo e movimentação turística mós la bele tanba ita hatene katak Tutuala ne'e fatin turístico, ema semana-semana bá passa sira-nia férias iha ne'ebá, ne'ebe ho presença Sua Excelência Sr. Vice-Ministro hato'o ba ministério competente atu haree lailais situação iha-ne'ebá. Ida-ne'e Tutuala nian.

Segundo, casa típica ou uma-lisan Lautém nian, ita hotu hatene katak além de Lautém nian, mós hanesan Timor tomak nian, nacional no internacionalmente conhece e sai ona património nacional Timor-Leste nian.

Ida iha vila central município Lautém nian, ida conhecido ho Uma Lisan Kaduak ne'ebé iha aldeia ida direção estrada Lospalos ba Tutuala, até agora la iha atenção husi Governo. Ha'u rona informação katak iha comissão ida, composto husi ita-nia maluk sira ne'ebé serbisu iha Inglaterra ne'ebá, atu halibur osan, ou sira halibur ona, e agora forma ona comissão ida atu reabilita ka constrói. Se reabilita, sei la iha fatin, tanba uma ne'e la existe ona. Maibé ha'u fó hatene ba Governo katak construção uma ne'e – ne'ebé agora la iha ona – halo iha tempo Indonésia nian, ne'ebe agora, tuir lei, sai ona Património do Estado. Ne'ebe se iha custos ba construção, ida-ne'e tem que husi Governo, labele husi fali grupo ida ka indivíduo ida.

Ida-ne'e mak ha'u hakarak fó hatene e obrigado.

Sr.^a **Presidente**: — Tuirmai, Sr.^a Deputada Mariquita Soares.

Sr.^a **Mariquita Soares** (FRETILIN): — Sua Excelência Presidente do Parlamento Nacional, Vice-Ministro dos Assuntos Parlamentares no composição da Mesa no mós distinto Deputado sira hotu ho povo doben Timor-Leste, ha'u-nia bom dia ba Ita-Boot sira.

Iha-ne'e ha'u hakarak aumenta tan saida mak ohin Deputado José hateten ona, kona-ba assunto contratado iha Ministério da Administração Estatal nian, liuliu iha PNDS,

Excelência Presidente do Parlamento Nacional, iha semana kotuk ha'u simu informação husi ita-nia maluk sira ne'ebé contratado iha programa PNDS nian katak hahú fulan-junho 2023 contratado hirak ne'ebé sei hala'ó sira-nia serbisu iha PNDS la simu ona sira-nia salário. Pessoal balu mak verbalmente liuhusi ação ruma hamosu indicação forte hodi hapara contratado sira ne'ebé iha ona. Ho ação hirak ne'e mak secretariado PNDS nian hato'o ona carta no nota explicativa, hodi explica kona-ba lala'ok no natureza PNDS nian, katak diferente ho programa sira seluk, maibé Ministro ho direção sira la fó apreciação ruma to'o ohin lora. Ministro ho verbalmente hato'o katak Ministro halo ona auditoria interna, no hein hela recomendação saida mak maihusi *audit* ne'e rasik, nune'e mós Ministro, ho verbal, hato'o katak sei halo ajustamento ba iha PNDS nune'e mós contratado sira sei hapara.

Excelência Presidente, situação loloos mak ne'e, iha município no posto de administrativo sira funcionário público la suficiente atu cobre serbisu PNDS nian, nune'e serbisu sira iha terreno barak mak hala'ó husi contratado sira. Exemplo, iha posto administrativo Fohorém, município Covalima, no mós posto administrativo Uatucarbau, município Viqueque, katak iha ema ida de'it mak cobre serbisu barak, tanba ne'e mak presença husi contratado sira importante tebes atu fó apoio ba serbisu hirak ne'e.

Excelência Presidente, técnico sira balu susar tebes atu halo monitorização ba projeto sira ne'ebé la'ó hela tanba hetan chamada verbal husi chefe sira. Daudaun ne'e projeto PNDS barak mak la'ó hela ka *on going*, hanesan projeto bee moos hamutuk 150, Uma Naroman ba Povo 4000, UNP+ hamutuk 1000, constrói sede suco hamutuk 50, fase 3 ciclo 4 hamutuk 200. Além de ne'e, projeto balu ne'e atu halo iha tinan ida-ne'e, mak hanesan projeto regular iha 678, Uma Naroman ba Povo hamutuk 3600, no reabilitação sede do suco hamutuk 40.

Orçamento ba projeto sira-ne'e iha tiha ona conta bancária suco ida-idak nian, tanba ne'e, Excelência Presidente, ha'u hakarak hatutan tan katak maioria contratado hirak ne'e iha ona experiência liu tinan tolu, no Governo ka Estado investe ona habilidade no conhecimento oiain ba sira, hodi bele contribui ba prestação de serbisu ne'ebé di'ak ba ita-nia povo no Rai Doben ida-ne'e. Ha'u hakarak hateten katak iha tinan lima liu ba kotuk, Governo nem hasai ema ida, e pelo contrário, recruta tan contratado sira hodi reforça serbisu no projeto sira-ne'ebé la'ó iha nível local. Nune'e mós la halo mudança ba iha contratado ka casuais ruma, só iha mudança ida ka rua, hanesan muda engenheiro nacional ba município tanba necessidade serbisu ne'ebé exige no projeto físico barak ne'ebé implementa iha município sira. Daudauk ne'e total funcionário casual sira hamutuk 354, hanesan ohin Deputado José hateten ona. Sira-ne'e hanesan técnico, engenheiro, funcionário *IT* e finanças ninian. Maibé atu hateten de'it katak ida-ne'e de'it mós la bele atu cobre hotu projeto ka programa sai ne'ebé ho volume boot tebes.

Excelência Presidente do Parlamento Nacional no Vice-Ministro dos Assuntos Parlamentares, ho número mak ha'u menciona, katak 354 pessoal, ne'e la'ós número ne'ebé ki'ik, nune'e ha'u preocupa. Se Governo ida-ne'e hapara sira, sei fó implicação ba iha qualidade projeto ne'ebé la'ó hela ka *on going*, la tuir desenho ne'ebé iha, no, se la iha funcionário casual PNDS sira, sei fó impacto ba fornecedor sira no badaen sira durante serbisu iha terreno, liuliu iha parte técnico no finança sira.

Exemplo, iha município Manatuto no Baucau. Iha Baucau, iha Venilale, Vemasse facilitador finanças hasai hotu ona, iha Posto Baucau Vila facilitador técnico no finanças mós hasai hotu ona, Quelicai, mós hasai hotu. Iha Manatuto mós hanesan, Posto Soibada no Lacló, município Manatuto rasik engenheiro sira hasai hotu ona. Maioria Uma Naroman ba Povo ne'e beneficiário decide hodi halo fali iha sira-nia uma fatin tanba ne'e temporariamente sira hela iha baraka. Quando hapara funcionaria sira-ne'e ...

Sr.^a **Presidente**: — Obrigado, Sr.^a Deputada.

Sr.^a **Mariquita Soares** (FRETILIN): — ... ne'e udan no loron ne'e kona sira, tanba ne'e mak atu husu ba Excelência Presidente ho Vice-Ministro dos Assuntos Parlamentares atubele tau atenção ba hahalok no assunto sira nune'e.

Obrigado wa'in.

Sr.^a **Presidente**: — Obrigada, Sr.^a Deputada.

Srs. Deputados, funcionários ne'e la'ós husi parte agora para o Governo ka husi bancada oposição mak hato'o, maibé relatório Comissão da Função Pública no Câmara de Contas mós chama atenção ba iha Governo, tanba recrutamento descontrolado. E, afinal PNDS mós ita contrata ema, *pada hal* nia regulamento ne'e la'ós funcionário mak hala'o, supervisão husi funcionários, maibé população mak hala'o. Ida-ne'e mak ita hala'o, regras ao contrário ne'e mak sala boot. E, com certeza katak racionalização funcionário contratado tem que halo, tanba subar iha Bens e Serviços, ne'e sala boot, Senhores Deputados. Ne'ebe ita filafali ba regras ne'ebé ita aprova, ita mós tem que cumpre regras ne'ebé ita hatuur ona, ne'e para labele iha problemas contratação fora do normal. Ne'ebe, dala ida tan, ita bele critica, mas husik Governo halo nia serbisu.

Tuirmai, Sr. Deputado Natalino dos Santos.

Sr. **Natalino dos Santos Nascimento** (CNRT): — Obrigado ba tempo.

Bom dia ba Sr.^a Presidente, composição da Mesa, Sr. Vice-Ministro dos Assuntos Parlamentares, colegas distintos Deputados, povo doben Timor-Leste mak ha'u respeita.

Sr.^a Presidente, ohin ha'u hakarak foti questão ida kona-ba cidadão Timoroan, ne'ebé bele dehan ho *bahasa* katak *kawin mawin*. Ita-nia inan-feton ne'ebé balu husi nação seluk, Indonésia, ou mane sira husi Indonésia kaben ho timoroan, quase balu ne'e iha ona quarenta e tal anos ona mak sira seidauk hetan sira-nia cidadania. Balu iha tiha ona bei-oan ona, sira balu mai iha 1975, quando invasão tama tiha mai Timor. Ne'e iha áreas fronteiras, hanesan iha Oe-Cusse, iha Suai, iha mós iha Maliana ka Bobonaro, e ha'u hasoru, sira iha questão barak. Sira dehan katak «Ami hela iha Timor kleur ona. Ami ema Timor ona, tanba ami iha oan no bei-oan, maibé to'o agora mai seidauk bele hetan ami-nia cartão eleitoral hanesan cidadão, atu participa iha cada festa democracia. Ami mós hakarak contribui ami-nia direito ba Estado ida-ne'e, maibé to'o agora ami seidauk iha tanba ho critério oioin atu hetan cidadania». Balu iha área hanesan iha Oe-Cusse, ko'alia tétum la hatene, oinsá sira atu mai tuir *tes*, liuliu ferik sira, katuas sira. Tanba ne'e mak ha'u foti questão ida-ne'e iha Parlamento Nacional atu haree to'ok sá possibilidade mak ita atu fó ba sira ka atribui ba sira, tanba sira hela iha Timor kleur ona, la'ós tanba sira-nia hakarak maibé tanba nu'udar humano sira hola ema Timor no sira hela iha Timor no iha oan no bei-oan ona. Tanba ne'e ha'u husu ba Parlamento Nacional, Estado, atu tau consideração ba assunto ne'e, nune'e bele fó soluções ba sira, bainhira sira mate karik sira iha ona identidade nu'udar timoroan.

Segundo, Sr.^a Presidente, ha'u hakarak foti questão ida, liuliu kona-ba projeto abandonado, especialmente iha Oe-Cusse, liuliu projeto edifício Autoridade ZEESM nian, ne'ebé halo ho 10

milhões de dólares americanos ho duração 18 meses maibé quase besik tinan lima ona projeto ne'e abandonado.

Terceiro, iha residência administrador antigo nian ne'ebé *tender* tiha ona, baku rahun tiha ona, to'o agora edifício ne'e soe hela, gasta osan.

Iha projeto barak ne'ebé abandonado hela, maibé agora daudaun iha Oe-Cusse projeto ne'e ita haree fahe de'it, hahú iha campanha to'o mai ohin loron, quase duzentos e tal projetos ne'ebé *tender* la tuir processo procedimento ne'ebé iha. Ha'u, foin daudaun, iha domingo semana ida-ne'e, iha Oe-Cusse, iha empresário balu ne'ebé mai hato'o sira-nia lamentações katak processo agora *tender* iha-ne'ebá emergência mak barak e la tuir procedimento. Por exemplo, iha *private meeting* loron ida, liu loron rua ba ona *site visit*, depois liu loron tolu submete ona documentos, ne'e hatudu katak, projeto ne'e *tender* maibé na'in iha ona. Tanba ne'e, iha oportunidade ida-ne'e ha'u husu ba Parlamento Nacional atu halo inquérito parlamentar ba Oe-Cusse para ita hatene projeto sira-ne'e.

Ohin Deputada balu dehan kona-ba declaração ne'ebé foin daudaun, semana liubá, Deputado Firmínio Taequi foti katak ponte rua ne'ebé iha Oe-Cusse la iha qualidade, sim, ha'u dehan katak la iha qualidade, tanba Ita-Boot sira bele bá to'o iha-ne'ebá, Comissão E tun ba direta atu haree katak la iha qualidade. E, projeto balu agora daudaun «tender» ne'e multiplica, tinan uluk halo tiha ona, agora halo tan. Sira dehan hanesan ne'e: «Projeto “tender” fahe ba, aban-bainrua Governo ida foun mai ka autoridade ida foun mai ne'e mak atu selu», e ha'u ko'alia ne'e tanba empresário sira, iha sábado foin daudaun ne'e, mai hasoru ha'u, husu ha'u atu mai foti questão ne'e iha Parlamento Nacional, nune'e bele tau atenção ba situação ne'e. No mós situação ida APS (Ami Pronto Serbí), dois mil e tal funcionário agora destacado ona iha cada departamento, balu to'o atus ida, balu limanulu e sira la iha fatin atu tuur. Tanba ne'e, dala ida tan, ha'u husu Parlamento Nacional atu halo inquérito parlamentar ba iha Autoridade Região Administrativa Especial de Oe-Cusse Ambeno, atu haree sasán sira-ne'e, porque projeto sira iha tinan uluk liubá abandonado hela to'o agora la hatene atu halo saida.

Obrigado, Sr.^a Presidente.

Sr.^a **Presidente**: — Obrigado, Sr. Deputado.

Tuirmai, Sr. Deputado David «Mandati».

Sr. **David Dias Ximenes «Mandati»** (FRETILIN): — Obrigado, Sr.^a Presidente.

Maluk Deputado sira hotu, ha'u-nia saudações fraternais.

Ha'u iha assunto balu iha-ne'e, horisehik, horibainrua ka semana uluk ne'e ha'u foti tiha ona, kona-ba compra de terrenos. Conforme artigo 54.º ita-nia Constituição dehan katak «Só ema cidadão Timor mak bele hetan propriedade privada».

Ha'u atu dehan ida-ne'e tanba horisehik, horibainrua, ha'u dehan tiha ona, karik bele buat ruma ita tem que halo para depois ita tem que hetan veracidade sira-ne'e.

Ha'u mós aconselha para ita convida ita-nia Ministro da Justiça, que tutela a Secretaria de Estado de Terras e Propriedades, para haree, e hanesan mós ita-nia Ministério da Administração Estatal ne'ebé haree, controla ita-nia chefe suco no chefe aldeia sira, para controla buat sira-ne'e.

Tanba saida mak ha'u foti problema ne'e? Ha'u lakohi que loron ruma ita mós sai hanesan iha Jakarta, ema sira be cidadão Batávia nian, ema barak ba hela, sira mak rai-na'in sira la iha tiha fali fatin, sira sa'e tiha ba foho, Jakarta agora ema seluk mak ocupa. Ida-ne'e mak ha'u ta'uk.

Ha'u mós hakarak foti iha-ne'e, ohin parece-me que Presidente mós foti ona, katak horisehik, horibainrua ema saúde nian mai ko'alia ho Ita-Boot, mas iha ponto ida-ne'e parece que haluha tiha. Ohin Ita-Boot frisa, kona-ba ita-nia ema ne'ebé iha estado gestação iha Timor ne'e tinan ida hetan 40 000, ho tan 6000 ho problemas, problemas sociais, problemas de facilidade buat sira seluk tan. Termo exato mak la'ós «gravidez», mas termo ne'ebé ohin ha'u dehan, ida-ne'e mak ita-nia problema balu para depois ita-nia saúde mós bele haree.

Terceiro, mak ohin ita-nia maluk ida ko'alia, – karik ita-nia Vice-Ministro bele depois iha Conselho de Ministros bele hato'o – kona-ba forças armadas tama iha festa, fardado e armado. Ha'u hanoin, ida-ne'e ita labele admite, porque selae ita sai fali hanesan buat seluseluk ne'ebé ita la gosta ne'e. Ne'e ladún di'ak ida.

Depois, ita mós tem que controla duni, hanesan ita-nia maluk sira dehan, aquisição de cidadania ne'e. La'ós dehan katak ita lakohi fó, mas, karik bele afrouxa uitoan ninia critério sira porque ita-nia maluk balu iha-ne'e kala kleur ona, até porque ita-nia ema ida iha malae mutin nia tempo kedas nia hela iha-ne'e, nia boot iha-ne'e, tanba de'it funu nia fila ba Portugal, nia filafali mai hetan tiha ninia cidadania, depois Ministério da Justiça hasai tan tiha fali. Ida-ne'e mós questão ida-ne'ebé depois ita bele considera uitoan.

Ida-ne'e mak ha'u hakarak hato'o.

Muito obrigado, Sr.^a Presidente.

Sr.^a **Presidente**: — Tuirmai, Sr.^a Deputada Cristina Rebelo.

Sr.^a **Cristina Yuri Rebelo dos S. Costa** (FRETILIN): — Bom dia, Sr.^a Presidente da Mesa distintos Deputados, Vice-Ministro dos Assuntos Parlamentares.

Iha-ne'e ha'u hakarak levanta assunto rua ne'ebé pertinente, ne'ebé iha relação direta ho Ministério Comércio e Industria no mós Ministérios Agricultura.

Ha'u hatene katak ha'u-nia maluk Deputado sira iha semana kotukbá hatete tiha ona, kona-ba foos ne'ebé folin sa'e iha comunidade nia leet no horisehik ha'u rasik bá to'o iha município Liquiçá e

hetan mós maluk balu iha-ne'ebá. Ao mesmo tempo husi município Same hato'o questão sira hanesan, katak foos folin sa'e duni, liuliu ba hirak ne'ebé entre 20 kg no 25 kg, que hetan preço ne'ebé aumenta.

Sr. Vice-Ministro, husi MCI (Ministério do Comércio e Industria) hatete katak hato'o ona ba AIFAESA, I.P. atubele halo intervenção, mas ao mesmo tempo AIFAESA, I.P. filafali hakarak hatene informação claro no evidência atu nune'e sira bele hala'o sira-nia intervenção ne'e mais rápido possível, tanba Lei n.º 4/2011 ne'ebé ko'alia kona-ba crime falsificação ka manipulação preço ne'e e mós Decreto-Lei n.º 29/2011 rasik ko'alia kona-ba preço justo que cabe ba sira e fó mós oportunidade ba sira hodi hala'o sira-nia serbisu.

Mas, ida-ne'e ita ko'alia kona-ba intervenção ka solução curto prazo, ne'ebé ita depende ba sira, tanba ne'e, Vice-Ministro, dala ida tan ha'u hatene katak Governo muito ocupado neste momento tanba Lei Orgânica foin mak aprovado, maibé iha momento hanesan sira mós sei discute, Ita-Boot sira sei discute kle'an kona-ba Retificativo, ho nune'e husu no encoraja nafatin ba Ministério Comércio e Indústria hamutuk ho Agricultura atu haree didi'ak kona-ba orçamento ne'ebé tau iha-ne'ebá atubele investe maka'as liután iha setor ida-ne'e.

Tanba ita hotu hatene, la'ós de'it preço foos nian mak sa'e, maibé agora daudaun ne'e povo barak mak lamenta, liuliu kona-ba importação tomate ne'ebé acontece ona, mai husi Belu, NTT.

Atu dehan de'it, iha 2013, iha análise ida husi *Australian Applied Science* ko'alia tiha ona kona-ba oportunidade, possibilidade ne'ebé bele la'o entre rai rua iha ita-nia fronteiras, liuliu ba Belu, NTT, no mós ba Batugade, e 10 anos depois, iha 2023, iha 29 de maio foin daudaun, ita hotu assiste katak importação ne'ebé acontece mai iha ita-nia rai husi Belu, sira consegue exporta ona 10 toneladas tomate mai ita-nia Rai. Ho nune'e, ida-ne'e afeta tebetebes e ita mós haree katak ita-nia povo balu, liuliu Associação Kuda Tomate iha Baucau, lamenta iha mídia, e iha mós intervenção direta kedas husi Ministério Comércio e Indústria, diretor mós, atu nune'e ikusmai ita bele mós reduz importação tomate ba ita-nia Rain.

Tanba ne'e, Sua Excelência Vice-Ministro, husu atu fó atenção máxima ba questão ida-ne'e tanba, hanesan ita hotu hatene, katak investimento iha agricultura mak solução ida loos no sustentável, ne'ebe mak gradualmente sei ajuda ita-nia povo hodi reduz pobreza, cria oportunidade emprego ka autoemprego ne'ebé permanente, reduz malnutrição no mós reduz importação.

Obrigada.

Sr.^a **Presidente**: — Tuirmai, Sr.^a Deputada Cedelízia dos Santos.

Sr.^a **Cedelízia Faria dos Santos** (CNRT): — Muito obrigada, Presidente.

Ha'u-nia respeito no bom dia ba Ita-Boot, composição da Mesa, Vice-Ministro dos Assuntos Parlamentares, distintos Deputados, audiência sira e maluk rona-na'in Rádio Parlamento Nacional, karik sintoniza hela ita-nia transmissão direta ida-ne'e.

Uluknanain ha'u hakarak secunda declaração política husi Bancada KHUNTO nian ne'ebé ko'alia kona-ba ita-nia alin feto ida-ne'ebé tau iha mídia social, ne'ebé ameaça atu oho ita-nia líder nacional sira. Questão ida-ne'e, ha'u hanoin, lamentável tebes no ita hotu tem que tau atenção ba ida-ne'e. Ohin nia bele foti liafuan ne'e hato'o ba líder nacional ida, aban-bainrua nia mós sei bele foti assunto ne'e tau mós ba ita-nia líder nacional sira seluk então, assunto ne'e grave tebetebes.

Ha'u mós triste uitoan, wainhira ita-nia Provedor dos Direitos Humanos mai hato'o nia relatório iha-ne'e, ha'u, momento ne'ebá, foti liman atu halo ha'u-nia ponto de ordem responde ba nia resposta, maibé infelizmente ha'u la hetan oportunidade, tanba nia mós haree liuhusi parte ida, nia mós la sente katak hanesan cidadão ida, ita-nia líder ida mós, wainhira ema ameaça, nia mós bele sente hanesan buat ida ameaça ba nia vida. Então, ha'u hanoin, questão sira-ne'e ita haree didi'ak, tetu halo didi'ak para responde karik labele ba liu parte ida maibé ita haree husi parte rua ne'e hotu.

Segundo, ha'u hakarak fó ha'u-nia apreciação boot ba relatório husi Comissão F nian. Husi relatório ida-ne'e bele ona hatudu mai ita, responde ona questão balu ne'ebé levanta beibeik husi Deputado sira iha Casa Magna ida-ne'e, liuliu kona-ba atendimento iha Hospital Nacional Guido Valadares. Husi relatório ne'e ita bele hatene katak capacidade Hospital Nacional Guido Valadares la'ós simu de'it paciente husi nacional, maibé quase husi 13 municípios ou husi hospital regional sira, ne'ebé moras sira-ne'e lori hotu mai. Então, ita bele compreende situação ne'ebé sira enfrenta, ita-nia número médico sira mós ladún barak. Ha'u hanoin, ba oin Governo tem que tau questão ba ida-ne'e, bele karik haruka ita-nia timoroan sira ba foti tan bolsa de estudo iha li'ur mai para bele ajuda ita-nia Hospital Guido Valadares.

Maibé, ha'u hakfodak uitoan fali ho sira-nia orçamento. Iha sira-nia relatório ne'e sira dehan katak sira-nia orçamento ne'e quase la to'o hela de'it, hetan de'it corte husi CROP (Comité de Revisão Orçamental Político) ka husi Governo, maibé na realidade ita haree Hospital Guido Valadares nian to'o data ida-ne'ebé tau iha-ne'e, iha junho sira-nia execução foin mak 39,9%, execução ki'ikoan tebes. Ita dehan katak iha problema barak iha ida-ne'e, iha ida-ne'ebá, tanbasá mak sira la bele usa osan ne'ebé ita tau tiha ona no Parlamento aprova ne'e hodi resolve sira-nia problema ne'e? Dehan osan la iha, mas na realidade osan iha mak la bele executa. Então, Vice-Ministro, ami husu Ita-Boot atu halo fali comunicação ho sira para resolve problema ida-ne'e, inclui mós ho SAMES, I.P.

SAMES, I.P. hatete katak sira foin mak mai primeiro de'it orçamento la iha tiha ona, mas na realidade sira-nia execução to'o julho ne'e 69,9%, ne'e execução inclui tiha ona «compromisso» ho *obligation*. «Compromisso» de'it 1.6, ninia *obligation* 2,8, ne'e montante ida-ne'ebé sei boot hela, só nia execução real de'it 3,6, significa katak nia execução foin 40% de'it.

Sim, ai-moruk mós la iha, tanbasá mak buat sira-ne'e bele acontece? Será que sira-nia processo aprovisionamento mak iha dificuldade ba sira? Ou em termos de sasán sira atu hatama mai ne'e mak iha problema ka oinsá?

Então ita precisa halo identificação didi'ak para bele resolve problema ne'e. As vezes ita dehan de'it osan mak la iha, maibé osan iha hela, la bele executa.

Baibain, sistema orçamento ne'e, quando ó executa ó-nia osan didi'ak mak ema bele fó osan liu ba ó. Ema dehan: «fó osan uitoan de'it ó la bele gasta, fó tan osan barak ba ó então aat liu», tanba ne'e mak, ha'u hanoin, Governo tem que haree, tau atenção ba questão sira-ne'e.

Ikusliu, ha'u hakarak secunda no hakarak foti questão kona-ba professor contratado sira, ne'ebé ha'u mós simu telefone no encontro mós ho balu ne'ebé husi município nian, sira mós husu nafatin, hanesan Deputado sira seluk husu ona, husu ba Governo, liuliu ba Ministério da Educação, se bele halo coordenação didi'ak ho Comissão da Função Pública.

Ha'u mós fó hanoin de'it, se bele harii equipa oan ida ne'ebé bele envolve mós município hotu-hotu para ita bele resolve tiha problema ida-ne'e. Se questão orçamento, ha'u hanoin, tempo badak sei lori orçamento mai, ita bele coloca mós iha-ne'ebá. Ita sei halo OGE 2024, se questão orçamento karik bele coloca iha-ne'ebá tanba professores contratados barak mak tama ona, ema dehan karik, reforma, contratado to'o de'it reforma, coitado tebetebes, triste tebetebes. Sira-nia contribuição maka'as mak ba ita-nia oan sira-nia futuro, futuro Timor nian, tanba ne'e mak ha'u husu dala ida tan ba Ministério da Educação, no ha'u fiar katak Sua Excelência Ministra bele resolve tanba nia iha capacidade iha área ida-ne'e. Tempo foin mak começa de'it, maibé ha'u espera katak iha tempo badak ita-nia Sua Excelência Ministra da Educação bele resolve ita-nia problema ne'e.

Mak ne'e de'it, obrigada barak, Sua Excelência Presidente.

Sr.^a **Presidente:** — Tuirmai, Sr. Deputado Antoninho Sarmento.

Sr. **Antoninho Doutel Sarmento** (FRETILIN): — Obrigado, Presidente.

Bom dia ba Excelência Presidente, presidência da Mesa, ba Sr. Vice-Ministro dos Assuntos Parlamentares, ba colega Deputado no Deputada sira hotu, mídia no povo Maubere tomak ne'ebé sintoniza hela Plenário ida-ne'e.

Iha-ne'e ha'u atu cita de'it ponto importante balu ne'ebé ita-nia chefe aldeia sira, liuliu iha Posto Turiscas, foti. Foin daudun iha inundação ne'e sira-nia dalan mais grave, to'o ohin lori seidak iha máquina pesado sira atubele tun para hadi'a, dificulta sira nunca bele lori sira-nia produto sira atu mai mercado, liuliu sira-nia café, la bele fa'an iha tempo ida-ne'e tanba estrada ne'e aat. Então, aproveita, Vice-Ministro, atubele toma nota para bele informa ba Ministério ne'ebé iha competência atubele tau atenção ba assunto ida-ne'e.

Assunto sira seluk, ponto ida mak iha semana kotuk, bainhira liuhosi Natarbora, ita haree katak iha projeto abandonado ida iha Ponte Mota Lamara. Ita hanoin katak ponte ida-ne'e tem que haree para oinsá atu hadi'a, atu considera, para ba oin ne'e bele facilita ita-nia agricultor sira husi Fatuberliu, Natarbora rasik.

Parece hudi sira ita *snack* iha-ne'e ne'e hudi sira husi parte ne'ebá. Ba ida-ne'e, ha'u hanoin katak ita tem que oinsá halo desenvolvimento ida di'ak iha nível infraestrutura.

Além disso ponte ida-ne'ebé iha Fatuberliu, ponte sira-ne'e, la hatene iha projeto pacote referendo iha tempo ne'ebá e to'o ohin ponte ida-ne'e la hadi'a, então bele toma nota atu considera iha Orçamento Retificavo ka orçamento sira tuirmai ne'e.

Tuirfalimai, atu hatete katak Notariado iha município Manufahi ne'e, tuir funcionário ne'ebé explica ba ha'u, ninia diretor ne'e às vezes hatuur iha-ne'ebá, mas la hela permanente iha fatin, dificulta ema atu hasai nia documento, para bele hetan de'it assinatura ida à rasca. Então, ha'u hato'o ba Ministério da Justiça para bele haree diretor ne'ebé atu hatuur iha-ne'ebá ne'e tem que ema ne'ebé atu hela duni no halo serbisu hodi serbí ita-nia sociedade iha fatin ne'ebá.

Atu secunda tan kona-ba assunto mercado nian. Horisehik ha'u iha Mercado Same, foos sira ho folin 17 dólares, iha Turiscái, informa mai, iha 18 dólares, então ita tem que tenta haree atu hadi'a sasán sira-ne'e.

Tanbasá mak preocupação ida-ne'e mosu? Tanba ita hotu nia kabun sei hamriik hela iha oin, ida-ne'e importante. Uma la iha ita bele resiste, roupa la iha ita sei bele resiste, mas hahán ne'e quando problema boot ne'e ita susar tebetebes, liuliu ita-nia comunidade sira iha base.

Ha'u hanoin, ida-ne'e mak informação que atu informa hela iha-ne'e para Vice-Ministro atu toma nota hodi mais rápido bele haree assunto ki'ikoan sira-ne'e atubele fó resposta.

Obrigado.

Sr.^a **Presidente:** — Tuirmai, Sr. Deputado Gabriel Soares.

Sr. **Gabriel Soares** (CNRT): — Obrigado, Sr.^a Presidente.

Bom dia ba Sr.^a Presidente, ba Mesa, ba distinto Deputado sira, ba mídia e audiência tomak.

Primeiro, ha'u mós hakarak aprecia kona-ba relatório husi Comissão F, parabéns ba Presidente Comissão F ho colega Deputado sira iha Comissão ne'e!

Ohin, ha'u lê iha página n.º 8, ha'u kaer de'it Presidente Comissão nia hateten, katak «problema saida?». Depois de ami acompanha ne'e, ha'u nota buat ki'ik ida, iha problema ida, liuliu mak iha SAMES, I.P. ne'e. Problema saida? Nia problema mak ida-ne'e, husu osan ba sunu osan. Husu osan ba hola reagentes la qualidade, nia problema mak ida-ne'e, husu osan ba sunu osan.

Tanbasá mak ha'u dehan «husu osan ba sunu osan»? Husu osan atu lori halo aprovisionamento, «tenderização», ba aquisição ai-moruk. Ai-moruk, halo aquisição, nia «tenderização» ba sosa husi Índia mak mai, distância Índia mai to'o Timor-Leste ne'e dook tebetebes. Ita iha vizinho besik, Indonésia, e maioria ita mós haree katak ita bele consumo paracetamol sira-ne'e husi Indonésia, tanbasá mak la besik-besik iha-ne'e para bele lori facilita? Índia mai tama to'o iha Timor ne'e nia demora tempo hira? Nia mai to'o iha-ne'e ai-moruk sai *kadaluwarsa* ona, *expired*, tem que ba sunu. Ne'e mak ohin ha'u dehan, «nia problema mak ne'e, husu osan sunu osan».

Segundo, husu osan hola reagentes la qualidade, ida-ne'e bele prejudica saúde cidadão Timor-Leste tomak ninian. Ha'u bele nota ida-ne'e de'it.

Tuirmai, ha'u mós hakarak haloos fali buat ida iha-ne'e. Ohin ha'u-nia maluk Deputado balu, ha'u hakarak fó informação katak ha'u-nia maluk Deputado balu – e agradece – foti mós kona-ba município Manatuto nian, kona-ba projeto abandonado Ponte Lamara.

Sr. Deputado, Ponte Lamara ne'e la'ós projeto abandonado, lae! Projeto está em estudo de viabilidade. Estudo hela de'it, estudo hela de'it, pronto, mandato Governo mós hotu ona, ne'ebe ba oin Governo foun haree to'ok oinsá para tau fali atenção ba ponte ne'e. Loos, projeto abandonado, la abandonado ida, ami foca iha-ne'e, maibé ideia ami-nian mak abandonado to'o agora ne'e.

Kona-ba preço sasán, sim, hanesan representante povo ita preocupa duni kona-ba preço sasán. Preço sasán ne'e atu muda tem que muda lei, lei ne'e iha Orçamento Geral do Estado, ne'ebe Orçamento Geral do Estado mai fali ne'e ita hotu-hotu haree muda lei ne'e tanba povo dada iis duni, foos folin karun, necessidade básica folin karun duni.

Talvez ita lalika fó sala ba ita-nia maluk sira ne'ebé fa'an foos iha quiosque, sira executa tuir de'it lei ne'ebé tau iha Orçamento Geral do Estado, kona-ba hasa'e taxa ne'e. Taxa ne'e mak prejudica. Ita-nia maluk sira fa'an foos karun ne'e tanbasá? Sira mai sosa foos iha-ne'e e ba iha-ne'ebá ne'e pelo menos sira mós tem que hetan fali *quarter* ida para lori selu ema sira hatún no hasa'e sasán ne'e ka.

Agora, Lei Orçamento Geral do Estado mai ita hatún iha-ne'e para oinsá bele tulun ita-nia comunidade bele iha poder de compra, ida-ne'e mak, ha'u haree, loos, nia dalan loos mak ne'e. Maibé, ita ko'alia de'it, tanba ita hasa'e tiha sasán folin liuhosi taxa, agora ohin mai ita questiona, pronto, hanesan representante povo ita preocupa duni. Ne'e duni, se ita hanoin dehan katak povo tem que iha kbiit de compra, Lei Orçamento Geral do Estado mai ne'e ita buka oinsá atu altera tiha, hatún ba *standar* normal para povo iha poder de compra.

Kona-ba ohin maluk balu dehan katak «Estatal hapara funcionário contratado PNDS», ha'u mós iha acesso ba circular ida husi Comissão da Função Pública, assinado pelo Presidente, Dr. Faustino, carta ne'e sai iha dia 31 de maio de 2023, husu cessa do mandato. Quando membro Governo ida nia mandato termina, automaticamente funcionário contratado sira-ne'e mós juntamente cessa.

Ida-ne'e husi Presidente Comissão da Função Pública, Dr. Faustino Cardoso, Ita-Boot sira bele confirma. Ne'ebe, membro Governo foun sira ba seidauk hapara ema ida, Sr.^a Deputada ou Deputado sira, seidauk! E, mandato ne'e mate iha fulan-junho, maibé dias, semanas antes assina tiha kedas mandato para que lori ba hato'o iha loron sábado, loron sábado ema feriado, Governo tomada de posse iha dia 1 de julho, sé mak atu ba assina fali contrato iha loron ida feriado ne'e?

Ne'ebe, ita haree ne'e la hasai ida, maibé mandato mak termina ona. Atu recruta fali ne'e por necessidade cada Ministério, ne'ebe colega sira, ida-ne'e mak situação tanba Governo foun tama seidauk hasai ita-nia maluk timoroan ida. Sira iha experiência, loos, ida uluk mós iha experiência, maibé ida-ne'e exonera, agora daudaun ne'e la'ós exonera, ida-ne'e mandato mak termina.

Obrigado.

Sr.^a **Presidente:** — Obrigada.

Deputada Cristina foti liman ba ponto de ordem, mas hein lai uitoan.

Saida mak Deputado Gabriel ko'alia ne'e loos tanba iha Orçamento Geral do Estado, para além de produtos ne'ebé açucarados agora implementa iha terreno ne'e, ida ho perfume, morin, ne'e mós kona hotu taxa, sala boot! Governo tem que haree ida-ne'e.

Liga ho foos, são bens consumíveis básicos ne'ebé sa'e husi 2,5% ba 5%, ne'e tem que hadi'a. Sr. Primeiro-Ministro, Xanana Gusmão, hato'o tiha ona katak sei hadi'a ne'e iha orçamento tuirmai, ita hein.

Ida-ne'e, ha'u hanoin, iha momento aprovação do Orçamento Geral de Estado husi oposição mós ko'alia, husi Comissão C, a Sr.^a Deputada Maria Angélica ho Deputada Angelina halo duni proposta, mas Sr. Ministro convence atu dada, no fim agora mak ita sente. Sala ita-nian duni, ita tem que reconhece. Ha'u mós iha legislatura iha-ne'ebá fó hanoin tiha ona, ne'ebe, razão ida mak ida-ne'e.

Razão ida mós tanba ita-nia porto ninia custo boot tebetebes, ne'ebé afeta mós ba ita-nia bens consumíveis e Comissão ba halo tiha ona fiscalização, hato'o ona ba Governo, mas Governo lakohi hatene, VIII Governo.

Razão ida, tanba às vezes ita iha maioria, ita vota tiha e agora ita arrepende, ne'ebe, ha'u hanoin, tem que hadi'a duni.

Sr.^a Deputada Cristina, Ita-Boot husu ponto de ordem para hatán ba ida-ne'e, ha'u hanoin, iha razão ida atu corrige duni. Mas ha'u fó um minuto ba Ita-Boot atu ko'alia, fundamenta atu ko'alia saida.

Sr.^a **Cristina Yuri Rebelo dos S. Costa (FRETILIN):** — Sr.^a Presidente, obrigada.

Ha'u husu invoca Regimento artigo 57.^o ponto f) hodi halo de'it esclarecimento.

Iha-ne'e loos duni katak ita hotu consciente, haktuir Lei n.º 15/2022, que ko'alia kona-ba Orçamento Geral de Estado de 2023, iha artigo 3.º, normalmente ita ko'alia kona-ba imposto, taxa no contribuições, maibé iha-ne'ebá, iha kedan ponto 5, mós hatuur ona kona-ba taxa, imposto kona-ba produto seletivo ualu, que iha-ne'ebá la temi foos iha laran.

Iha produto seletivo sira-ne'e mais ou menos ko'alia, hanessian ohin Sr.ª Presidente ko'alia, temi kona-ba açúcar, temi kona-ba bee, temi kona-ba cerveja sira-ne'e, maibé iha-ne'ebá foos ne'e ita la temi e agora daudauk, se ita bele haree loloos, Sr.ª Presidente, ita la haree kona-ba taxa ne'e nia afeta, maibé ita haree katak especulação do preço tanba razões, fatores, oioin ne'ebé companhia fornecedor sira hato'o. Ida-ne'e mak ita precisa haree, tanba ne'e husu atu ita hotu bele serbisu hamutuk através husi Governo, husi Ministério ne'ebé relevante, bele halo hela intervenção direta ba ida-ne'e tanba ida-ne'e especulação, ida-ne'e la'ós questão taxa ne'e rasik, mas especulação preço ne'e mak aumenta duni.

Obrigada.

Sr.ª **Presidente:** — Obrigada.

Especulação, iha lei ne'ebé combate crime ne'e duni, maibé tem que bá buka tuir e iha Ita-Boot nia comissão duni. Bá buka tuir, ita sanciona sira ne'ebé halo especulação! Está bem? Ne'ebe, *tugas* Ita-Boot sira-nian.

Tuirmai, Sr. Deputado Luís Roberto.

Sr. **Luís Roberto da Silva** (KHUNTO): — Obrigado, Sr.ª Presidente do Parlamento Nacional.

Dala ida tan bom dia ba Ita-Boot, ba Sr. Vice-Ministro dos Assuntos Parlamentares no ba colega Deputado no Deputada sira.

Iha-ne'e, primeiro, ha'u hakarak fó apreciação ida ba iha relatório Comissão F, ne'ebé trata kona-ba assunto saúde pública, nian tanba ha'u haree liu ba iha conclusão no recomendação, ita precisa duni atu halo reabilitação infraestrutura básica sira. Ita precisa hadi'a planeamento iha-ne'ebá, *management*, e depois controlo ne'e tem que máximo duni atu nune'e implementação ne'e tem que di'ak, selae mak cada fulan neen ou tinan ita rona mak dehan ai-moruk la iha, depois ita-nia paciente sira ba iha-ne'ebá de vez em quando ai-moruk la iha fila de'it. De vez em quando sistema controlo mós ladún di'ak. Iha Hospital Guido Valadares la iha mas iha clínica sira-ne'e iha fali. Ita-nia doutor sira balu dala ruma bele foti ai-moruk ne'ebé husi Hospital hodi fa'an filafali iha sira-nia *apotik* rasik. Ida-ne'e acontece, ita precisa controla didi'ak.

Ha'u-nia pergunta ida ba iha Comissão F mak ne'e: iha funcionário contratado na'in-hira iha-ne'ebá to'o agora seidauk sai permanente? Ha'u precisa hatene número funcionário contratado iha SAMES, I.P.

Ikusliu, ha'u-nia recomendação ida. Agora quase iha notícia RTTL fó-sai katak iha fulan-julho nia laran caso ISPA (*Infeksi Saluran Pernapasan Akut*), infeção respiratória aguda, iha território nacional ne'e quase número aas, ha'u recomenda ba comissão F atu tun halo fiscalização to'ok, número ne'e aas duni ka lae. Ida-ne'e mak ha'u nia intervenção.

E, tuirmai mak ha'u hakarak secunda mós Bancada FRETILIN ninia intervenção ohin. Loos duni katak iha momento ne'ebá ita aprova hasa'e taxa, mas hasa'e folin ida-ne'ebé lai. Foos la temi duni, hasa'e ba sasán midar sira-ne'e, agora ita generaliza. De vez em quando ita-nia negociante sira-ne'e manipula sasán no foos mós sira hasa'e folin, ida-ne'e mak ita precisa ko'alia.

Iha Baucau ne'ebá mós foos 25 kg ne'e sa'e makas, 30 kg mós hanesan, sa'e. Momento ita hasa'e taxa ne'e la'ós hasa'e em geral, hasa'e ba ida-ne'ebé merece bele hasa'e no ida-ne'ebé la merece hasa'e, la inclui foos ida, ne'ebe ida-ne'e mós ita precisa haree. Karik IX Governo mai filafali agora atu halakon hotu para taxa ne'e la bele iha tan, di'ak liután, ita aprova filafali para Timor ne'e buat hotu gratuita. Timor ne'e, gratuita de'it ne'e, ha'u fiar katak tinan sanulu ou ruanulu mai tan Timor nia desenvolvimento la'o di'ak liután. Quando buat hotu gratuita, lalika iha tan taxa, lalika iha tan contribuição, *yang penting* osan 18 bilhões iha hela ita-nia fundos ne'ebá ne'e, ita mai, depois fó vencimento, fahe ba ita-nia comunidade sira han hemu, taxa ida la iha, depois tinan ruanulu ou tolunulu mai tan ita hotu moris hotu di'ak, ita bele sai fali segundo Singapura, Timor-Leste.

Obrigado, Sr.^a Presidente.

Sr.^a **Presidente**: — Segundo Singapura, ita mate hotu, Sr. Deputado, taxa iha-ne'ebá makas liu ita. Labele haluha, Srs. Deputados, taxa seletivo, sim! Mas taxa 2,5% ba 5% ne'e sobre saida? Haluha? Ne'e todos os bens consumíveis, ne'ebe ita haree fali lei ne'e lai para ita comenta ba iha nia fatin.

Ita *breack* atu ba *snack* tanba 11h00 ona.

Sr. Deputado Joaquim ponto de ordem por essa razão? Ha'u fó minuto ida, ita ba *break*. Está bem?

Halo favor, Sr. Deputado.

Sr. **Joaquim dos Santos «Boraluli»** (FRETILIN): — Obrigado, Sr.^a Presidente.

Com todo o respeito ha'u invoca artigo 57.º Regimento, ponto f) atu observa assunto ki'ikoan ida.

Sr.^a Presidente hakarak ko'alia, tun mai iha kraik! Labele debate ho Deputado sira. Nos termos de Regimento, Presidente modera de'it debate sira, sé mak bele halo debate é membro do Governo, Presidente apenas, nos termos do Regimento, modera e regista as questões, encaminhar. Se Sr.^a Presidente hakarak debate, então tun mai iha kraik.

Obrigado, Presidente.

Sr.^a **Presidente**: — Ha'u agradece, mas Sr. Deputado nia memória fraca. Uluk Sr. Deputado Aniceto hatán, Ita-Boot nonook. Agora ha'u hatán, la'ós hatán Deputada Cristina, mas fó lembra, tá bem, Sr. Deputado? É preciso ter memória fresca, ainda passaram só uns meses.

Muito obrigado, ita ba *break*.

Sessão ne'e suspende iha tuku 11 liu minuto 8 no retoma fali iha tuku 11 liu minuto 37.

Sr.^a **Presidente**: — Srs. Deputados, ha'u husu para Ita-Boot sira hola fatin para ita hahú fali ita-nia sessão.

Até 1h00 sei iha Deputado na'in-sanulu, ne'ebe cinquenta minutos, ita sei iha horas ida. Depois anúncio ho resposta Sr. Vice-Ministro dos Assuntos Parlamentares, ita sei iha tempo, ne'ebe ha'u husu para Ita-Boot sira hola fatin.

Tuirmai, Sr. Deputado Florentino Ximenes, não sei se está cá.

Sr.^a Deputada ida dehan katak seidak iha quórum.

La iha buat ida, sira balu iha kotuk, hakarak ko'alia, mai! Selae hotu ona, ha'u taka, ne'ebe la iha problema ida. Vinte e quatro, funcionamento iha, ne'e kan la iha decisão, bele la'o hela, Srs. Deputados.

Halo favor, Sr. Deputado Florentino.

Sr. **Florentino Ximenes da Costa «Sinarai (FRETILIN)**: — Obrigado, Presidente.

Quórum iha ka lae? Mas, pronto.

Sr. Deputado ne'e rasik hamnasa.

Presidente Parlamento Nacional, composição da Mesa, ba Colega Deputado e Deputada sira hotu, povo doben Timor-Leste, camarada buibere no maubere sira hotu, iha semana kotuk liubá ha'u foti problemas sobre segurança ninian, ne'ebé hetan duni atenção maka'as, consegue kaer duni criminoso sira ne'ebé halo problema iha Díli laran. Só iha parte balu de'it caso desconhecido balu mak seidak hetan, hanesan iha Elemloi, hanesan mós iha Dare, situação sira-ne'e de'it mak seidak hetan atenção tanba ita-nia inteligência sira kala menos.

Ida tan fali, ha'u husu ba Sr. Vice-Ministro dos Assuntos Parlamentares, eu patriota, geração patriota, colega, atu husu de'it no fó-hatene informação mós, iha suco Bauró Lospalos nian, tinan

sanulu ba kotuk maluk veterano sira balu inicia halo estátua ba Mateus Sinarai da Costa ninia *patung*. *Patung* ne'e to'o agora la halo, continuação la iha, tanba ne'e mak ha'u husu Sr. Vice-Ministro atu tau atenção hela ba buat ne'e. La halo ne'e tanba ema sira inicia halo ne'e nem oan de'it mós sira considera, fó hatene, *patung* ne'e halo de'it. Ema sira halo ne'e agora mate hotu ona, ha'u la hatene tanbasá mak sira mate hotu, talvez tanba sira la fó hatene ba oan ka halo nu'usá. Mas, buat ne'e sira la halo to'o agora.

Fatin ne'e uluk Comandante em Chefe das FALINTIL, atual Primeiro-Ministro, subar iha suco Bauró ne'ebá hamutuk ho comandante Saibada, fatin ne'e ita bele hatete katak fatin histórico tebes. Atu halo de'it ema rai-na'in ne'e ninian... ema ne'e mós herói boot, nia naran Mateus Sinarai da Costa, *patung* ne'e la halo tanba osan ne'e ha'u la hatene ba hotu iha-ne'ebé karik, mas la conclui projeto ne'e to'o hotu, tinan sanulu ona. Tanba ne'e, ha'u husu ba Sr. Vice-Ministro atu fó-hanoin hela ba iha Assuntos Veteranos nian para haree situação ida-ne'e.

Ida tan mak, Sr.^a Presidente Parlamento Nacional, agora ne'e la'ós ona *ABRI Masuk Desa*, uluk Indonésia mak halo buat ne'e. *ABRI Masuk Desa* la iha ona, tanbasá mak força sira ba ema nia festa usa fali farda, lori fali kilat? Situação ida-ne'e ita tem que tau atenção, porque *ABRI Masuk Desa* la iha ona, rai ne'e liberdade ona, farda sira hanesan la serve ona atu tama iha festa.

Ha'u hanoin, ida-ne'e de'it mak atu fó hatene hela iha dadeer kmanek ida-ne'e.
obrigado, Sr.^a Presidente.

Sr.^a **Presidente**: — Tuirmai, Sr. Deputado Mateus de Carvalho.

Sr. **Mateus da Cruz de Carvalho** (CNRT): — Bom dia, Sr.^a Presidente, composição da Mesa, Vice-Ministro dos Assuntos Parlamentares, colega Deputado no Deputada sira.

Iha questão ruma mak ha'u foti iha-ne'e: ida kona-ba construção uma sira agora daudauk iha Díli laran, ita haree, descontrolada, liuliu uma sira ne'ebé China sira halo iha estrada protocolo. Ita bele haree hanesan iha embaixada Austrália nia oin, iha construção uma andar lima mas nia riin ne'e ho besi de'it, ida-ne'e sai preocupação tebetebes. Ha'u hanoin katak Sr. Vice-Ministro bele chama atenção ba Ministro das Obras Públicas atu haree condição ida-ne'e tanba se continua nafatin hanesan ne'e, Díli ne'e ita haree desorganizado, liuliu kona-ba construção uma sira iha capital ne'e.

Segundo, questão ida kona-ba labarik menoridade sira ne'ebé continua hala'o atividade comercial iha Díli laran.

Ita haree, quase to'o 8h00 kalan, labarik menoridade, criança, ne'ebé sira-nia tempo ne'e ba estudo, continua halo circulação iha Díli laran hodi fa'an sasán iha fatin público sira. Ha'u hanoin, ida-ne'e, liuliu ba Ministério da Educação. Ita mós iha organização barak tebetebes ne'ebé toma

responsabilidade ba assunto sira-ne'e mas no fim continua nafatin, existe labarik ho menoridade sira ne'ebé halo circulação iha kalan hodi halo atividade comércio ninian.

Ida tan, ita haree katak iha ensino pré-escolar sira-ne'e, pré-primária sira-ne'e, começa iha labarik ne'ebé menoridade consumo álcool ho tabaco. Ha'u hanoin katak ida-ne'e sai preocupação tebetebes tanba ita haree labarik ki'ik sira husi escola secundária sira, sai escola, la'o iha estrada pública, sira fuma sigaru. Loraik no kalan mós continua nafatin ho atividade consumo álcool iha bairro laran. Labarik sira-ne'e tama categoria menoridade, mas ida-ne'e continua nafatin acontece. Ha'u hanoin, ida-ne'e precisa toma atenção e consideração, liuliu coordena ho Ministério da Administração Estatal ho chefe suco, chefe aldeia sira-ne'e atu controla situação sira-ne'e, tanba ita ko'alia kona-ba segurança iha território Timor laran tomak, buat sira-ne'e ninia *dampak* ne'e mai husi consumo álcool iha bairro laran husi labarik menoridade sira. Quase ida-ne'e mak acontece nafatin iha território Timor laran tomak.

Ida tan, kona-ba bee moos, ita sempre ko'alia kona-ba questão bee moos iha capital, mas iha sorin seluk ita mós haluha tiha katak comunidade sira la tau atenção ba utilização bee moos. Bee, quando mai, ita usa conforme ita-nia hakarak. Bee moos, ne'ebé tuir loloos sira bele taka torneira atu ema seluk bele aproveita, ita-nia comunidade sira continua loke hodi rega estrada. Em vez de taka para bee ne'e conserva, para ema seluk bele aproveita, mas lae, comunidade mós la iha consciência atu haree situação sira-ne'e. Dala ida tan fó hatene ba chefe suco no chefe aldeia sira para controla buat sira-ne'e. Bee ne'ebé ema seluk bele utiliza, mas comunidade, quando bee mai, loke dadeer to'o loraik, então bee sira la usa ona, em vez de sira tau torneia taka, sira continua usa fali bee ne'e para lori rega rai no estrada sira-ne'e. Ha'u hanoin, ne'e maka questão tolu ne'ebé ha'u foti.

Obrigado, Sr.^a Presidente.

Sr.^a **Presidente**: — Obrigado.

Bee selu ona mak foin hakfodak. Agora, como gratuito be, enfim.

Tuirmai, Sr.^a Deputada Verónica Fernandes.

Sr.^a **Verónica Fernandes** (FRETILIN): — Bom dia, Sr.^a Presidente, composição da Mesa, Sr. Vice-Ministro dos Assuntos Parlamentares, ba maluk Deputado sira no mós povo doben Timor-Leste.

Iha-ne'e ha'u hakarak foti assunto rua, ne'ebé ikus-ikus ne'e ita haree, liuliu kona-ba violência baseia ba género, violência sexual no assédio sexual. Ita hatene katak caso tolu ne'ebé ohin ha'u temi começa sai ona ameaça boot ba ita-nia sociedade tanba relação poder ne'ebé la iha balanço entre feto mane, entre ema ne'ebé iha osan ka ema ne'ebé la iha osan, ema ne'ebé iha kbiit ka la iha kbiit.

Problema ida-ne'e sai boot ba beibeik tanba vítima barak tebes hili dalan nonook. Balu consegue lori ba tribunal no hetan justiça, balu fali subar an iha sira-nia vida tomak, e balu fali decide

oho an. Situação ne'e mosu, e dala barak acontece iha família ne'ebé tuir loloos sai proteção ba sira iha fatin público no mós iha escola sira.

Ba declaração ida-ne'e ha'u hakarak liga ho publicação notícia *Lafaek News Online*, ne'ebé ita acompanha iha semana foin lailais ne'e, katak desconfia docente ida halo assédio sexual ba nia estudante iha carreta laran.

Sr.^a Presidente, ida-ne'e preocupante tebetebes tanba caso refere fó risco bá ita-nia oan feto sira, liu-liu maluk feto sira-ne'ebé hakarak ganha capacidade, conhecimento, no habilidade iha universidade sira. Ha'u preocupa tanba docente ida usa ninia poder influência nian hodi fó pressão ba estudante feto ne'ebé vulnerável. Tanba ne'e husu ba ministério ne'ebé tutela atu tau atenção no toma medida disciplinar ba situação ne'e atu labele acontece iha futuro no previne atu labele acontece tan iha universidade seluk ou iha fatin serbisu ka iha fatin público sira.

E depois, iha assunto ida tan. Ita mós acompanha iha mídia social, ita haree estudante secundário sira tolok, maltrata iha sala laran, além de hakerek e risca liafuan la educado iha escola sira. Ida-ne'e preocupante tebes tanba escola ne'ebé, tuir loloos, sai centro de aprendizagem hodi kuda fini di'ak ba futuro Nação ne'e ninian, sai fatin ida ne'ebé ema tolok. Ida-ne'e la contribui ba processo aprendizagem ne'ebé di'ak, tanba ne'e recomenda ba Ministério Educação no mós ba escola sira atu tau atenção ba questão ne'e.

Obrigado barak.

Sr.^a **Presidente:** —Tuirmai, Sr. Deputado Marcos Soares.

Sr. **Marcos Soares Martins** (CNRT): — Obrigado ba oportunidade.

Respeito ba Presidente Parlamento Nacional, composição da Mesa, Vice-Ministro dos Assuntos Parlamentares, distinto e distinta Deputado sira hotu, bom dia.

Aproveita oportunidade ida-ne'e hakarak hato'o, lori inan-aman agricultor sira hotu nia naran, especialmente agricultor café iha município sira ne'ebé ho café, iha besik tinan ida ona sira halo ona sira-nia processo reabilitação café ka tesi, facilita husi ita-nian companhia balu, hanesan CCT (Cooperativa de Café de Timor), ACT (Associação de Café de Timor) ne'ebé facilita sira tesi café e Associação Café Timor seidauk halo pagamento ba segunda fase. Tanba ne'e mak inan-aman sira exige atu selu ona sira-nia osan ne'ebé promete tiha ona iha tempo liubá tanba sira tesi tiha café besik halo tinan ida seidauk halo pagamento.

Segundo, hakarak exige ba segunda vez, ligado ba orçamento aprovado ba bolsa de mérito, ne'ebé to'o agora seidauk halo pagamento. Ha'u rasik ba *check* iha BNCTL, iha município Ermera, nem labarik ida hetan. Husu ba Ministério da Educação atubele processa osan ida-ne'e lailais uitoan tanba ita atu tama ona ba orçamento retificativo. Osan ida ne'ebé aprova uluk ita tem que resolve tiha

mak ita ba fali fase seluk, selae hanesan tusan ida ita deve tiha, ita tama tan ba retificativo e depois ita tama ba OGE, buat ida tinan antigo nian ita seidauk bele resolve.

Obrigado ba ita hotu.

Sr.^a **Presidente**: — Tuirmai, Sr. Deputado António da Conceição.

Sr. **António da Conceição «Kaloan»** (PD): — Obrigado, Sr.^a Presidente.

Bom dia ba Sr.^a Presidente, bom dia mós ba colega Deputada e Deputado sira hotu, ba mídia sira.

Ha'u-nia intervenção ba Ministério rua ninia atuação, ida ba Ministério da Saúde, ida seluk ba Ministério do Turismo.

Ba Ministério da Saúde, ha'u hakarak atu apoia relatório ne'ebé ohin Comissão F apresenta, ne'ebé hahú identifica problema sira ne'ebé durante ne'e ita hasoru, liuliu iha hospital, prestação de serviços ninian.

Ha'u hanoin, relatório ida-ne'e di'ak tanba bele mós ajuda atu ita haree kona-ba prioridade de 120 dias, hanesan Sr. Primeiro-Ministro ko'alia, kona-ba ai-moruk sira. Ha'u hanoin, ne'e importante tebes ba ita hotu atu haree relatório ne'e hodi bele coloca questão sira ne'ebé precisa atu hetan atenção.

Segundo, ha'u hanoin, relatório ne'e descreve função sira ne'ebé la'o iha hospital ninian, e ha'u haree problema boot ida iha hospital ne'e mós mak gestão iha hospital ne'e rasik em termos facilidades existentes, liuliu camas, quarto, buat sira ne'ebé iha. Ha'u bele compreende problema ne'e tanba ita hotu halai ba iha Hospital Guido Valadares, hanesan ohin dehan, paracetamol de'it mós ita bá hotu iha hospital. Maibé, ninia implicação ida mak ne'e, fatin ne'ebé iha ne'ebá quase que la to'o duni.

Ha'u koko kalan quase lima tuituir malu iha-ne'ebá, iha-ne'ebé ha'u-nia kaben de'it mós toba duni iha corredor, hanesan paciente iha-ne'ebá. Ne'e situação ne'ebé preocupa, halo atu ita tem que hahú hanoin ho seriedade kona-ba gestão iha hospital ninian ne'e. Ne'e outro ponto.

Ida terceiro, ligado ba serbisu ne'ebé Comissão ida-ne'e hala'o ho Ministério da Saúde. Ita precisa duni, iha ona ema barak atu halo atendimento iha hospital, ita precisa ne'e política ida ne'ebé di'ak iha Ministério da Saúde hodi ita bele fó atendimento ba ita-nian população sira. Médico barak, mas quando la iha condições, sira la bele halo buat ida.

Ne'e ida primeiro ligado ba Ministério da Saúde.

Segundo, ba Ministério do Turismo, ha'u hanoin, início ida ne'ebé di'ak tebes. Ha'u aprecia ho papel Vice-Primeiro-Ministro e Ministro Coordenador dos Assuntos Económicos no mós Ministro do Turismo nian. Recentemente ne'e ita haree visitas organizadas ne'ebé mai. Foin daudauk ha'u, por a caso de'it, mós observa katak iha comunidade chinesa ne'ebé iha Austrália hahú organiza malu hodi mai Timor. Ne'e ato importante ida ne'ebé bele mós passa mensagem ba desenvolvimento turismo iha

Timor, tanba visita sira organizado hanesan ne'e mak ita precisa tanba Bali ninian ne'e mós la'ó hanesan ne'e. Ita tem que ser hahú dada atenção ida mai Timor hanesan daudauk halo ne'e. Para além de sira mai atu visita família, visita mós sira-nia fatin, visita mós maluk sira ne'ebé mate tiha ona, honra mós ita-nian heroi sira balu, ne'e momento ida oportuno duni atu hahú passa mensagem ida ba mundo katak Timor ne'e mós destino turístico ida, ne'ebé iha ona condições mós atu hela porque sira impressionado mós ho condições ne'ebé agora daudauk ita Timor iha. Ne'ebe, aprecia ba Sr. Ministro ninia início do trabalho ida-ne'e, mós aprecia ba coordenação ne'ebé di'ak entre Associação das Comunidades Chinesas iha Timor. Ne'e buat ne'ebé, ha'u hanoin, Ministério sira seluk mós precisa atu hahú hodi nune'e ita bele organiza malu didi'ak, hodi bele mós lori nafatin turista mai Timor hanesan forma ida mós atu promove Timor.

Ikusliu, para além serviço ne'ebé di'ak, ha'u hanoin, – ida-ne'e serbisu ida-ne'ebé karik ministério ne'e herda, la'ós nia mak halo – jogos dispersados iha Timor ne'e, iha município sira, precisa iha política ida atu regula jogos ne'e, labele hanesan agora daudauk ne'e, hanesan forma ida distração de'it, ne'ebé atu hasai tiha ema ho preocupações, andamentos políticos, buat hotu-hotu. Ne'e forma distração ne'ebé di'ak mas ninia efeito negativo ne'e maka'as tebes, ema feen ho la'en soe malu, baku malu, tanba buat sira ne'ebé la merece. E ida-ne'e ato provocado. Ne'ebe ha'u husu, karik bele, termina tiha jogo sira iha município ou suspende!

Obrigado.

Sr.^a **Presidente**: — Muito obrigado.

Tuirmai, outro Sr. Deputado António, António Verdial. Dois Antónios.

Sr. **António Verdial da S. Ferreira** (KHUNTO): — Obrigado ba Presidente.

Excelência...

Sr.^a **Presidente**: — Sr. Deputado António Verdial?

Sr. Deputado balu dehan katak António Verdial mós iha rua.

Ou desculpa, ha'u mak engana.

Sr. **António Verdial da S. Ferreira** (KHUNTO): — ... desculpa. Excelência Presidente Parlamento Nacional ho composição da Mesa, Excelência Sr. Vice Ministro dos Assuntos Parlamentares, distintos Deputados no Deputadas, audiência hotu no mídia ne'ebé halo cobertura iha Parlamento ida-ne'e.

Excelência, hanesan representante povo nian iha Uma-Fukun, Parlamento Nacional, lamenta ho atos ne'ebé AIFAESA, I.P (Autoridade de Inspeção e Fiscalização da Atividade Económica, Sanitária e Alimentar, Instituto Público) halo ba negociante ki'ik sira iha Mercado Taibessi, hodi *sita* hotu cigarro ne'ebé negociante ki'ik sira fa'an iha-ne'ebá. Cigarro ilegal ne'e agora tama iha Timor-Leste la'ós hola direta husi negociante ki'ik sira, maibé sira sosa tutan de'it mak hodi fa'an filafali iha-ne'ebá. Maski iha ita-nia lei la autoriza cigarro ilegal tama mai iha Timor-Leste, ho intervenção husi AIFAESA, I.P. nian lori sofrimento boot ba povo ki'ik sira ne'ebé halo negócio iha fatin-ne'ebá. Tuir loloos, antes atu halo intervenção iha parte ne'ebá, AIFAESA, I.P. tem que halo uluk sensibilização ba mercado tuir Decreto-Lei n.º 22/2016, 29 de julho, ne'ebé fó legitimidade jurídica. Atuação ne'e la fó favorecimento ba povo, nia protege fali ba *crossing illegal* sira. Hodi nune'e mak ha'u husu ba parte competente, hanesan alfândega e segurança, liuliu husi UPF, atubele serbisu ho máximo controla cigarro ilegal tama iha Timor-Leste atu nune'e labele halo fali vítima ba negociante ki'ik sira iha mercado.

E tuirfalimai, ha'u husu ba parte competente, hanesan Direção Nacional de Transportes Terrestres atubele tau sinais trânsito nian iha fatin sira, hanesan iha recinto Palácio do Governo no Parlamento Nacional atu comunidade bele conhece hodi labele halo *parkiran* arbiru iha-ne'ebá. Tanba la iha sinais trânsito nian, então comunidade sira pára arbiru iha fatin sira ne'ebé importante. Tanba ne'e mak husu ba parte competente atu acelera hodi tau sinais atu ema hotu-hotu bele hatene no motorista sira bele hatene. Karik liu bá liu mai iha fatin ne'ebé mamuk, sira la hatene, sira bele mai *parkir* iha-ne'ebá, então polícia tem que kaer. Ida-ne'e atu fó-hatene sai, iha fatin ne'e agora acontece tanba haree ho matan katak sira pára kois iha ne'ebá, polícia kaer tiha, halo *tilang* tiha iha-ne'ebá. Ne'ebe, ida-ne'e atu fó-hatene sai para bele tau-matan mós ba iha fatin sira importante hanesan ne'e.

Obrigado.

Sr.^a **Presidente**: —Tuirmai, Sr.^a Deputada Lídia Norberta.

Sr.^a **Lídia Norberta dos Santos Martins** (FRETILIN): — Obrigada, Sr.^a Presidente.

Bom dia ba Sr.^a Presidente, composição da Mesa, Srs. Deputados, mídia no maluk rona-na'in sira.

Em primeiro lugar hakarak halo apreciação ba relatório fiscalização ne'ebé Comissão F halo. Iha-ne'e hatudu katak relatório ne'e haree duni questão ne'ebé durante ne'e ita foti e afinal to'o agora iha nafatin pertinência. Então, ho ida-ne'e ami hakarak liga ba questão ida, liuliu ida iha página n.º 6. Bainhira ba halo fiscalização iha Hospital Nacional Guido Valadares, iha-ne'ebá hatete katak, «se hakarak halo estabelecimento apropriado, prioridade mak halo estabelecimento fatin ba paciente ho moras mental», ida-ne'e questão ne'ebé beibeik ona ita hato'o iha legislatura anterior, até iha

apresentação relatório parecer ba Orçamento Geral do Estado tinan-tinan, husi Grupo das Mulheres Parlamentares ho comissão sira seluk hato'o mós questão ida-ne'e, tanba ita haree katak iha Centro Laclubar ne'e privado e Estado to'o agora seidauk iha centro saúde mental ida. Ida-ne'e preocupante tebetebes, maibé agradece, Governo tau prioridade ida-ne'e, se bele continua para hodi ba oin haree nafatin kona-ba questão ida-ne'e.

Tuirfali, Sr.^a Presidente, se bele karik, buat ida fiscalização ne'e – ne'e ha'u recomenda hela ba Comissão F – halo mós ba iha farmácia no mós clínica sira-ne'e. Tanba saida maka ami dehan hanesan ne'e? Tanba iha página n.º 6, quando Ita-Boot sira halo relatório kona-ba SAMES, I.P. nian, iha ne'ebá dehan katak Ministério Saúde mak responsável ba controlo qualidade ai-moruk no consumíveis médicos iha facilidade saúde sira. Ami-nia recomendação mak ne'e, se bele karik controla mós iha fatin sira seluk, tanba, por exemplo, iha clínica sira China nian ne'e ita hola ai-moruk maibé ita la hetene ai-moruk ne'e nia conteúdo saida, hakerek ho China nian lian, se mak hatene. Então, se bele karik, ami recomenda, haree mós kona-ba questão ida-ne'e.

Tuirfali, Sr.^a Presidente, preocupação ne'ebé colega Deputado sira ohin foti relaciona ho situação funcionário contratado sira iha Ministério da Administração Estatal, ami atu dehan de'it katak iha Decreto-Lei n.º 8/2013, iha ne'ebá regula kona-ba Regime Geral do Programa Nacional de Desenvolvimento dos Sucos e hetan alteração iha 2021 liuhusi Decreto-Lei n.º 18/2021. Mesmo que iha alteração, maibé iha artigo 24.º ne'e mantém nafatin versão ida 2013 nian, hatete katak «com exceção da composição das estruturas do suco, o quadro pessoal do Secretariado Técnico do PNDS e suas unidades orgânicas é preenchido nos termos do regime da função pública», ida-ne'e maka sai hanesan base legal ba Ministério da Administração Estatal ida anterior halo contrato ida-ne'e e ida-ne'e ita kaer mós filafali ba Decreto do Governo n.º 8/2015, ne'ebé ko'alia kona-ba Regime Jurídico dos Contratos de Trabalho a Termo Certo na Administração Pública. Ne'ebe, se bele karik, bainhira ita haree kona-ba questão ida-ne'e, haree to'ok base legal sira-ne'e ida ne'ebé. Ita la fó sala ida maibé ita haree to'ok nia continuidade ne'e halo nu'usá.

Ikusliu, Sr.^a Presidente, preocupação kona-ba tomate, to'o agora ita la iha laboratório atu bele certifica sasán ida iha rai-laran ne'e iha qualidade ka sasán, tomate, ida importado ne'e mak iha qualidade. Então, população sira ne'ebé produz tomate lamenta tebetebes quando iha Parlamento ita ko'alia dehan katak tomate iha rai-laran ne'e la iha qualidade. Se bele karik Governo haree mós para halo laboratório ida hodi haree ida-ne'e, tanba selae orsida ita-nia agricultor sira mós sacrificado. Se mak atu fó referência ka fó garantia mai ita katak tomate ida importado ne'e mak iha qualidade, se rua ne'e la iha certificação hotu? Ne'ebe, questão ida ami coloca ne'e mak ne'e: se bele haree ba ida-ne'e, hodi nune'e ita bele fomenta duni ita ninia agricultor sira hodi hasae produção e labele desanima sira ba iha situação ida-ne'e.

Obrigada.

Sr.^a **Presidente**: — Tuirmai, Sr.^a Deputada Sancha Tilman.

Sr.^a **Sancha Margarida Tilman** (PD): — Obrigada, Sr.^a Presidente Parlamento Nacional.

Composição Mesa, Excelência Vice-Ministro dos Assuntos Parlamentares, distinta e distinto Deputado sira no maluk rona-na'in sira mak ha'u respeita.

Primeiro, ha'u aprecia ba relatório fiscalização Comissão F nian, ne'ebé mai ho nia recomendação lubuk ida. Iha hein katak ho nia recomendação sira-ne'e bele hetan consideração husi ministério competente iha gestão de implementação ba plano Orçamento Geral do Estado 2024 nian, no, karik balu ne'ebé seidauk prevê iha Orçamento Geral do Estado 2024, sira bele iha consideração atubele tau iha plano ação anual Orçamento Geral do Estado 2024 nian, atu nune'e bele responde ba necessidade ita hotu nian.

Segundo, nafatin ha'u intervém ba direito husi maluk idoso sira, ne'ebé sira-nia direito subsídio ba idoso simu tinan ida dala rua, ba cada fulan neen. Maibé, iha tinan ida-ne'e to'o fulan ne'e ona, até to'o fulan hitu, fulan-julho ne'e remata tan ona, sira seidauk simu sira-nia direito ida-ne'e. Fukun ka razão saida mak prejudica ka taka dalan ba Ministério da Solidariedade Social seidauk bele processa maluk idoso sira-nia direito? Será que ho mudança estrutura membro governante sira mak resulta processo pagamento direito maluk idoso sira-nia tarde hanesan ne'e?

Tuir informação husi maluk idoso sira balu katak iha tinan ida rua ba kotuk sira balu simu sira-nia direito idoso nian ne'e tinan ida dala ida de'it, nune'e, ho situação atual dala ruma bele mós acontece iha tinan ida-ne'e ba maluk sira ne'ebé simu tinan ida dala ida de'it.

Nune'e, husu ba Excelência Vice-Ministro dos Assuntos Parlamentares atubele transmite informação ka lamentação husi ita-nia maluk idoso sira-ne'e ba Ministério Solidariedade Social atu nune'e bele toma em consideração ba sira-nia situação ida-ne'e.

Ha'u hanoin katak ba direito sira ne'ebé sira la simu, sira mós hanesan ho ita, dala ruma ita sira tuur iha-ne'e ka ba maluk sira ne'ebé hanesan funcionário público, sira-nia direito fulan ida de'it la simu ka atrasa iha data de'it mós sira lamenta tebes, ita hotu mós lamenta tebes, sá tan ba maluk idoso sira ne'ebé, coitado, simu 50 dólares de'it. Ida-ne'e bele tarde ida hanesan ne'e? Dala ida tan ha'u husu ba Excelência Vice-Ministro dos Assuntos Parlamentares atubele transmite informação ne'e ba Ministério da Solidariedade Social atu toma em consideração. Karik ida-ne'e la bele, ha'u sei exige tan dala ida, karik sei bolu ministro competente atubele mai justifica iha Parlamento ida-ne'e.

Obrigado barak.

Sr.^a **Presidente**: — Tuirmai, Sr. Deputado Antoninho Bianco.

Sr. **Antoninho Bianco** (FRETILIN): — Boa tarde, Presidente no componente Mesa, representante Governo, Sr. Ministro dos Assuntos Parlamentares, colega Deputado sira, maluk sira ne'ebé acompanha.

Ha'u secunda buat ne'ebé di'ak, buat balu di'ak ne'ebé ohin hatu'o iha Plenário husi comissão nia serbisu no seluk-seluk. Maibé ha'u mós iha hanoin balu katak ba preparação ida Governo atu lori Orçamento Retificativo karik, ita dehan orçamento por programa, então se bele labele sobu programa! Programa ne'ebé *on going*, di'ak liu ministério hotu-hotu iha parte ne'ebé de'it ita labele buka tenta atu sobu tanba Governo ida mai ka foun, nia atu continua buat balu ne'ebé la'o ona, la'ós sobu, princípio regula. Agora, retificativo ne'e la iha relação sobu fali programa ne'ebé la'o ona. Ha'u hanoin, processo ne'e, bele balu processo concurso karik, buat sira-ne'e hotu, ne'e tem que fó-hanoin mós.

Tuirmai, ita baibain ko'alia barabarak kona-ba fortalecimento instituição, agora ha'u mós husu: instituição Estado atu força karik cada membro Governo precisa ema hira atubele nia instituição ne'e forte? Então mapa pessoal. Mapa pessoal ne'e maka determina instituição atu força ka lae, pessoal ne'e iha qualidade ka lae, e meio sira. Ne'ebe, iha parte ne'e mós atu dehan katak regras maka orienta ita halo processo recrutamento, balu funcionário permanente, balu agente da administração pública, balu contratado e balu mós dehan nomeação política, ita tem que fahe. Categoria balu nomeação política buat seluk ida, categoria balu tanba circunstância ita obriga, – volume serbisu – atu reforça instituição, ne'e buat seluk ida.

Ne'ebe, ha'u hanoin, se recruta ema tanba exigência instituição nian, volume serbisu que justifica, então la iha regras seluk que atu usa fali atu desvaloriza ita-nia ema sira ne'ebé serbisu ona atu hala'o saida maka durante ne'e hala'o. Ne'ebe, hirak ne'e maka atu fó-hanoin. Hanesan representante povo, representa mós sira ne'ebé horas ne'e daudauk hala'o serbisu iha instituição Estado, e representa mós sira seluk ne'ebé halerik maibé la halerik ba ema hotu, halerik ba ita. Tanba ne'e mak, ha'u hanoin, ita tem que considera sira, la'ós ita político mak considera malu de'it, maibé considera mós sira ne'ebé ho estatuto la hanesan ita, maibé sira mós halo buat balu ba Nação ne'e.

Tuirmai, ha'u dehan, ohin ita ko'alia kona-ba buat barak mak la'o tiha ona iha ita-nia Rain ne'e, construção iha fatin-fatin, ema ida-idak halo construção tuir sira-nia hakarak, tanba saida? Ausência das regras de licenciamento kona-ba construção. Tanba ne'e maka ema ida-idak, estrangeiro ka timoroan, harii iha fatin ne'ebé nia hakarak, sé maka atu avalia sé. Sé mak iha osan halo tuir nia hakarak. Tanba ne'e maka, ha'u hanoin, regras maka lacuna karik, buka bá, Governo ida toma conta ida-ne'e tem que halo nu'usá mak estabelece regras. Tanba ne'e dala ruma regra sai mai, construção mós sem pagamento, ausência, ema livre tomak de'it. Bainhira maka dehan buat hotu-hotu tem que ho regras? Porque selae ema ne'ebé rico halo buat ruma sem iha regras, ita sira ne'ebé representa povo hakilar. Lacuna iha regra sira ne'ebé iha ne'e tem que, Governo ne'e nian trabalho de casa, halo nu'usá mak preenche. Ne'ebe, ha'u hanoin, hirak ne'e buat balu ita bele dehan tinan barak, maibé tinan ne'ebé

atu ukun ho volume serbisu ohin ita hotu ko'alia ne'e bele halo buat ruma karik. Ha'u hanoin, ida-ne'e hanesan trabalho de casa ida ba Governo karik, e ita hotu bele fó-hanoin, e representante husi Governo bele anota e recomenda ba sira, 47 membros Governo, ninia serbisu iha oin.

Sr.^a **Presidente**: — Muito obrigada, Sr. Deputado. Ne'ebe, seidak 100 dias, husik ba mak ita husu malu.

Tuirmai, iha pedido ponto de ordem Sr. Deputado Firmínio. Halo favor fundamenta.

Sr. **Firmínio Taequi** (CNRT): — Obrigado.

Bom dia ba Presidente e composição Mesa, Vice-Ministro dos Assuntos Parlamentares.

Ha'u atu responde de'it ohin Deputada levanta kona-ba ponte rua iha Oe-Cusse. Ha'u ko'alia tuir preocupação povo nian, tuir preocupação ema barak nian, la'ós tuir grupo nian, ne'ebe, atu halo loos ida-ne'e, husu ba Parlamento Nacional atu halo inquérito parlamentar.

E, tuirmai, ha'u secunda de'it Deputado Natalino ohin ko'alia kona-ba *tender* ne'e. Agora loroloron *tender* hela de'it, recruta hela de'it, tinan kotuk sira-ne'e lakohi recruta, lakohi halo *tender*, ne'ebe, agora daudauk ne'e sira halo atu fó todan de'it ba IX Governo.

Obrigado, Presidente.

Sr.^a **Presidente**: — Obrigado.

Tuirmai, Sr.^a Deputada Maria Barreto.

Sr.^a **Maria Gorumali Barreto** (CNRT): — Obrigada, Sr.^a Presidente.

Boa tarde ba Sr.^a Presidente, composição da Mesa, no mós ba distinta no distinto Deputado sira, Sr. Vice-Ministro no mós audiência tomak.

Sr. Vice-Ministro, iha assunto ida-ne'ebé sério tebes liga ba assunto saúde, liuliu ba iha Ministério Saúde. Ita iha paciente ne'ebé moras sério e precisa atu refere ba rai-li'ur. Iha paciente hamutuk 36, ne'ebé nia documentos haruka ona ba Sr.^a Ministra Saúde, maibé to'ó agora seidak hatún despacho. E, husi 36 paciente ne'e, iha paciente ida mak nia vida remata tiha ona, significa lakon vida, e ida-ne'e acontece ba menoridade 14 anos, ne'ebé urgentemente tem que transfere ba rai-li'ur, maibé impacto husi la hatún despacho, acontece situação ida-ne'e. E sei hela 35 paciente, maibé até agora Ministra la hatún despacho ba direção sira-ne'ebé atu trata assunto sira refere. Trinta e seis paciente ne'e nia problema mak passaporte la iha, então precisa iha linha coordenação interministerial, husi Ministra da Saúde tem que haruka carta ba iha Ministro dos Negócios Estrangeiros e Cooperação no mós Ministro da Justiça oinsá bele processa documento sira-ne'e. Mas, realidade ida-ne'e la acontece, seidak acontece, tanba técnico sira hein hela processo documento sira-ne'e, maibé despacho la iha. Ida-ne'e ba carta ne'ebé... karik mós carta sira seluk pendente hela iha-ne'ebá. Ne'ebe

husu ba Sr. Ministro, favor ida hato'ó hela bá tanba saúde ne'e trata ema nia vida, la'ós animal nia vida, ne'ebe ita precisa atu considera assunto sira-ne'e.

Tuirmai, liga ba Deputada Lúdia nia preocupação, kona-ba tomate local iha Timor no mós tomate ne'ebé mai husi li'ur precisa teste, distinta no distinto Deputado sira, ita iha Laboratório Nacional, ita iha direção ida-ne'ebé bolu naran Toxicologia, ida-ne'e mak halo teste ba *make-up* sira, ba ai-moruk no mós iha máquina ida mak teste ba hahán sira hotu. Maibé, ita iha máquina, reagente mak la iha, nia problema ne'e iha ida-ne'e. Ne'ebe, bainhira halo fiscalização iha-ne'ebá, ami mós hanesan ta'uk fali hotu ba hahán sira-ne'ebé importa tama mai, maibé la iha teste, ne'ebé bolu atenção ba ita hotu atu haree ba ida-ne'e. Tanba ne'e mak ohin iha ami-nia relatório fiscalização nian dehan katak sira husi Laboratório Nacional, husi Direção Toxicologia, dehan katak quando halo plano orçamento anual, sira sempre tau reagente ne'e, mas na realidade la hatene nia lakon ne'e iha-ne'ebé. Tanba ne'e mak ohin ami dehan ona katak ami precisa atu halo fiscalização mós ba Direção Farmácia iha Ministério Saúde, será que nia lakon hotu iha Ministério de Saúde ou to'o bá SAMES, I.P. oinsá, precisa atu buka tuir ida-ne'e.

No mós ikus, ha'u agradece ba opinião sira ne'ebé mai husi distinta no distinto Deputado sira ba Comissão F ninia relatório ne'ebé iha, assunto ida-ne'e mak prioridade duni ita atu haree tanba relevante duni.

E atu taka, Sr. Vice-Ministro Assunto, ohin ne'e importante tebes atubele trata ho urgente.
Obrigado barak.

Sr.^a **Presidente**: — Muito obrigado.

Ita komik, mas os tomates sai popular loron hirak-ne'e.

Sr.^a *Presidente rasik hamnasa.*

Tuirmai, Sr.^a Deputada Maria Angélica Rangel.

Sr.^a **Maria Angélica Rangel da C. dos Reis** (FRETILIN): — Muito obrigada, Sr.^a Presidente do Parlamento Nacional, Srs. Vice-Presidentes, Sr.^a Secretária da Mesa, Sr. distinto Deputado sira hotu no mós povo rona-na'in sira hotu.

Em primeiro lugar, ha'u hakarak fó parabéns ba relatório Comissão F ninia ne'ebé ba halo fiscalização tuir knaar no mandato Constituição ne'ebé fó ba iha Parlamento Nacional hanesan órgão fiscalizador.

Depois de ha'u rona tiha husi relatório ida-ne'e, iha-ne'ebá iha conclusão, iha página n.º 14 no 16, ko'alia kona-ba reagentes ho *stockout* ne'ebé reflete dificuldade iha Hospital Nacional ba atendimento saúde, ho tan número hirak tuirmai. Ha'u-nia pergunta mak ne'e: tanbasá?

Ohin Sr.^a Presidente mós ko'alia kona-ba nia fukun ne'e ita hetan ona, mas iha-ne'e conclusão ne'e, ba ha'u-nia entendimento, mamuk loos. Tanbasá mak la iha reagentes tinan ba tinan? Então ita hamutuk buka ninia fukun ne'e iha-ne'ebé loos. Será que gestão mak la di'ak? Será que governantes mak la di'ak? Ou será que máquina Estado mak la di'ak? Tanba ne'e mak ita tem que buka fukun ne'e iha-ne'ebé. E saida loos mak la loos, ita tem que, hanesan ema político, buka hatene tanba ita mak fó poder político ba Executivo hodi halo execução ba knaar sira-ne'ebé ita fó.

Agora, Sr.^a Presidente Parlamento, haree ba página n.º 15 ho 16 husi relatório ne'e, assunto ida interessante tebes, Sr.^a Presidente karik hatene, dehan nune'e: «tau prioridade hodi aloca orçamento ho montante 1.2 milhões de dólares hodi selu dívida eletricidade ne'ebé desde iha 2017 to'o 2020 seidauk resolve». Ha'u hanoin, questão dívida não-financeira ne'e hahú mai iha tempo naruk ona. Sr.^a Presidente no Sr. Deputado sira ne'ebé mai husi III Legislatura lembra muito bem, e liuliu iha Comissão C lembra muito bem, katak iha exemplo ida uluk ita-nia ministério balu la selu dívida ba *Timor Telecom*, então sai hela de'it dívida financeira, dívida financeira. Mai iha perceção Comissão C nian ne'ebé trata assunto Finanças Públicas, ko'alia kona-ba ita hasai osan husi bolso sorin tau iha bolso sorin, ida-ne'e mak realidade hatudu, katak hotu-hotu, instituições públicas, ne'ebe Estado mak tem que haree. Agora questão sira-ne'e dificulta ita-nia atendimento Hospital Nacional ne'e e oinsá ita atu soluciona sasán sira-ne'e?

Ida fali, Sr.^a Presidente, ha'u hakarak liga ba questão empréstimo ne'ebé iha, ne'ebé ita executa ona empréstimo por volta de setenta milhões de dólares liga husi Manatuto bá iha Natarbora, Natarbora liga bá município Manufahi e liga mós ho município Viqueque ne'ebé ho dalan aat. Iha-ne'e Deputado barak mak ko'alia ona, hanesan Deputada Irene, Deputado husi Manatuto, Deputado Gabriel, uluk mós ha'u rona Deputado Adérito Hugo, ne'ebé agora Vice-Ministro, ko'alia kona-ba estrada ne'ebé liga distrito rua ne'e husi Manatuto bá, tanba ha'u hatene katak ne'e osan empréstimo nian, agora daudauk aat hela.

Ha'u foti questão ne'e durante iha 2019, 2020, 2021, to'o agora estrada ne'e quase atu kotu ona, mas questão importante mak ne'e: iha relatório Tribunal das Contas ninian iha relatório Conta Geral do Estado 2021 ko'alia nune'e: «Dívida financeira do Estado 2021. Foram assinados três contratos de empréstimo pelo Governo, sendo que no período de 2012 até 2021 foram assinados 21 contratos... bla bla bla... empréstimo».

Agora, questão ba ha'u mak ne'e: depois de assina contratos, depois de ita implementa, projeto ne'e ninia retenção ne'e to'o iha-ne'ebé? Hotu tiha ona ka, ita tem que halo foun fali ka oinsá?

Liga mós ba iha Ponte Lamara ne'ebé Deputado sira sempre foti. Ponte Lamara, ha'u concorda ho Deputado Gabriel, ne'e la'ós projeto abandonado, maibé projeto ne'e atu implementa mai iha período ida naruk tem que halo lai ninia estudo de viabilidade técnico e financeiro ne'e, katak Estado mak atu harii ka ita tem que foti meios husi ita-nia parceiro sira hanesan empréstimo, ita bele halo. Tanba ne'e mak dudu malu hela halo com que iha tinan naruk nia laran ita la bele implementa e ita la bele harii ponte ida que liga distrito tolu hamutuk, no mós ita-nia população sira atu halo escoamento ba iha produto local sira ne'ebé atu lori mai iha mercado.

Agora, liga fali ba ita-nia questão telecomunicação, iha sábado no domingo ha'u iha área Natarbora no mós iha Fatuberliu, halo atividade iha-ne'ebá, linha ne'e la iha kedas, só *Telemor* de'it mak iha, *Timor Telecom* ho *Telkomcel* la iha, mate. La'ós dehan *wi-fi* mak mate, lae! Rede *seluler* ne'e la iha kedas, então dificulta com que ema la bele halo ligação mai nacional ou ligação bá questão emergência sira-ne'ebé povo hasoru, hanesan iha semana ne'e nia laran, karik ohin Deputado la cita, iha ema ida mout iha tasi Natarbora nian to'o agora seidak bele foti tanba questão atendimento, questão mós iha ligação para husu apoio husi nacional ba município sira-ne'e.

Ha'u hanoin, questão sira-ne'e ita atu ko'alia kona-ba Governo mak la di'ak ka, Governo mak di'ak ka, ida-ne'ebé di'ak, maibé ha'u hakarak hateten katak sé-sé de'it mak povo ne'e fó legitimidade, nia tem que assume ninia knaar no mós haree ba desempenho ne'ebé fó atubele serbí Rai ida-ne'e, la'ós atu dehan katak *si A* mak bá, *si A* mak la halo, *si B* mak halo, lae! Ne'ebe, ha'u hanoin, hanesan ema político ne'ebé povo fó ona legitimidade ita mai tuur iha-ne'e, *entah* nia husi bancada Governo, bancada oposição, ita tem que ko'alia lian ida de'it tuir Constituição haruka, katak ita ne'e um órgão fiscalizador, que atu fiscaliza atos governantes nian.

Ha'u hanoin, ida-ne'e mak ha'u hakarak ko'alia ba Presidente.

Atu conclui, Sr.^a Presidente, ha'u husu hela ba Sr.^a Presidente Comissão F, agora daudauk ne'e iha ami-nia grupo 12 Novembro nian husu hela raan ba iha Sr. Sebastião Gomes ninia pai ne'ebé ho raan O+, maibé iha Hospital la bele fornece, tanba ne'e mak ha'u husu ba Sr.^a Presidente Comissão F, karik iha oportunidade bele liga mós ba governante sira, Sr.^a Ministra da Saúde ka Vice-Ministro sira, atu haree hela questão ne'e tanba saudoso Sebastião Gomes nia aman agora daudauk iha hela isolamento e precisa hela raan atu Estado ne'e fó apoio.

Ha'u hanoin, ida-ne'e de'it mak ha'u hakarak comenta iha loron ne'e.

Obrigada, Sr.^a Presidente.

Sr.^a **Presidente**: — Tuirmai, Sr.^a Deputada Olinda Guterres.

Sr.^a **Olinda Guterres** (KHUNTO): — Boa tarde ba Sr.^a Presidente do Parlamento Nacional, Secretária da Mesa, colegas Deputados, maluk rona-na'in sira no mós maluk sira ne'ebé tatoli liafuan mai, preocupação mai ha'u hato'o iha ohin dadeer-saan nian.

Sr.^a Presidente, Sr. Vice-Ministro, comunidade iha Taibesi semana ida liubá kotuk ne'e jovem sira tuda malu, husi Bekaeh, suco Lahane Oriental, Posto Na'in-Feto. Sira ne'e kalan-kalan tuda malu, e depois husi fatin ida mós ba tesi kotu hotu cano ne'ebé liga ba sira hodi hetan bee moos. Nune'e mós sira la hakmatek, quando kalan ona atu tama 7h30 ona sira tuur la hakmatek, hotu-hotu, iha Lahane Ocidental. Ne'ebe sira precisa tebetebes, husu ba polícia atubele controla to'o iha-ne'ebá atu nune'e jovem sira tem que hela hakmatek.

Ida fali tan, ha'u rona informação liuhosi telefone no ema mós mai hasoru ha'u, kona-ba veterano sira. Veterano nia osan ne'ebé fulan-fulan ko'a 30 dólares ne'e sira na'in-sia mak mai to'o iha ha'u-nia uma, veteranos, mas ema ne'e 20 anos iha FALINTIL iha-ne'ebá, sira mai dehan katak «se ami-nia osan mak ko'a 30 USD por mês, iha rihun ba rihun, veterano sira rihun ba rihun *kali* to'ok ida-ne'e, Sr.^a Deputada, *kali* to'ok hetan hira. Ami exige ba Governo atu ami-nia osan ne'ebé 30 USD por mês tem que entrega filafali hotu», tanba momento ne'ebé atu ko'a sira-nia osan ne'e sira la hatene, de repente de'it BNCTL fó-sai dehan ko'a sira-nia osan maka sira foin hakfodak.

Desculpa, sira tatoli liafuan mai, ha'u hato'o, ha'u hato'o de'it, ne'e la'ós competência ha'u-nian, maibé ha'u hato'o tuir sira ne'ebé ko'alia, dehan katak orçamento ne'ebé agora tama mai ba veterano, Ministro Veterano nian lalika aloca osan bá, usa de'it osan 30 USD ne'e. «La iha buat ida, ha'u bá hato'o de'it, ne'e la'ós ha'u-nia competência, ita-boot sira mak hato'o, ha'u hatutan. Iha-ne'ebá encaminha, orsida Parlamento mak encaminha ba Governo».

Mais ou menos preocupação ida-ne'e de'it mak ha'u hato'o, mas veterano sira-ne'e, Sr. Vice-Ministro, bele karik tau atenção, tanba ema lakohi dehan katak ko'a sira-nia osan 30 USD tanba la husu autorização ba sira osan na'in. Ha'u mós la hatene. Ne'ebe, se osan ne'ebé mak aloca ba Ministro Veterano ninian sei iha, então sira-nia osan 30 USD por mês tem que entrega filafali hotu ba ema na'in, tanba sira la hatene, ne'e hanesan ilegal, cobra ilegal.

Ha'u la hatene, ha'u-nia la'en veterano, momento ne'e ha'u mós hakarak veterana, mas ha'u lakohi, fahe malu, husik ha'u-nia la'en veterano e ha'u lalika ida, iha uma laran ida mak sai ba hotu-hotu veterano ne'e ha'u la gosta.

Ida-ne'e mak ha'u hakarak hato'o, Sr.^a Presidente.

Origada barak ba oportunidade.

Sr.^a **Presidente**: — Ikusliu, Sr. Deputado Dário Madeira.

Sr. **Dário Madeira** (FRETILIN): — Obrigado.

Boa tarde ba Sr.^a Presidente, composição Mesa, Sr. Vice-Ministro dos Assuntos Parlamentares.

Iha assunto barak ne'ebé ha'u atu ko'alia, maibé Deputado sira balu ko'alia ona, então ha'u ko'alia ida-ne'ebé naran sá de'it...

Primeiro, nafatin hato'o lamentação, ita-nia jovem sira-ne'ebé atu continua estudo ba iha rai-li'ur, dificuldade ne'ebé sira enfrenta mak passaporte. Ida-ne'e sai nafatin preocupação ida ne'ebé to'o agora ita-nia jovem barak, estudante finalista sira, ne'ebé hotu sira-nia estudo iha tinan 2022 to'o a data seidauk bele continua sira-nia estudo iha rai-li'ur, tanba ne'e karik iha meios seluk ne'ebé Governo bele resolve karik, bele resolve!

Passaporte comum sira ne'ebé iha fulan-setembro mai, tuir Ministro Justiça nia declaração, karik ita bele haree ida-ne'e. Maibé liuliu estudante sira-ne'e, meios saida mak Governo bele resolve problema passaporte estudante sira-ne'ebé ba escola iha rai-li'ur?

Segundo, ha'u hakarak mós atu ko'alia, se la sala hahú husi VI Governo tesik mai, problema eletricidade sai problema boot, ne'ebé Deputado barak liu iha Parlamento ne'e preocupa tebetebes, mas resposta ida ne'ebé membro Governo sira altura ne'ebá fó ba Deputado sira katak «sei hahú husi suco, suco hotu tama aldeia». Se la sala iha altura ne'e iha suco 76 sucos ne'ebé precisa atu instala eletricidade.

Agora ba oin, aldeia sira ne'ebé to'o agora eletricidade seidauk tama ne'e, ho IX Governo ida-ne'e, ha'u hanoin, bele acelera processo ida-ne'e tanba atu tama ona ba tinan 2024 nian ne'e sira bele acesso ona ba naroman hodi sira bele contente. Iha área barak, ha'u la bele temi iha-ne'e iha-ne'ebé, maibé conforme ha'u hatene katak iha aldeia barak que seidauk bele acesso ba eletricidade. Maski hela de'it 50 metros, hela de'it 20 metros para sira bele dada ba mós sira direito sei la bele iha, tanba seidauk iha autorização ruma ba ida-ne'e.

Terceiro, ha'u hakarak ko'alia nafatin de'it katak ba IX Governo tem que tau atenção máxima ba construção estrada husi Lariguto ba Viqueque, tanba uluk companhia ida iha-ne'e hapara tiha ona tanba nia halo serbisu marca passo, iha fatin de'it. Maibé, karik entrega fali ona ba companhia internacional ho empréstimo ne'ebé agora hahú husi troço Baucau ba Viqueque, Viqueque ba Venilale, Venilale ba Viqueque karik, ha'u hanoin, bele acelera processo ida-ne'e para bele hahú tanba movimento transporte ida Díli ba Viqueque husi Aselaitula tun ba ne'e coitado tebes, até ita bele nani de'it bee laran tama to'o Viqueque vila. Até to'o tiha Viqueque vila mós iha estrada ida ne'ebá, dala barak ha'u ko'alia iha fatin ne'e, Sr. Vice-Ministro hatene hela, Viqueque Vila ba Lugatohi precisa iha estrada alternativo.

Karik nafatin de'it iha Lugatohi ne'e então tem que emergência, halo estrada ida lais, se la bele lais, alternativo ne'e tem que loke, selae estrada ida-ne'e mak kotu total, ema la bele halo serbisu ba Estado, tanba ema barak liu hela iha kraik, edifício Estado sira hela liu mai iha parte Beloi nian.

Ida seluk, ha'u atu ko'alia de'it kona-ba cidade Díli ninian, liuliu kona-ba ita-nia motorista sira, sira quase maioria la compreende *lampu merah* nia utilização ne'e ba saida, liuliu condutor ne'ebé

buka passageiro sira-ne'e mós la hatene atu pára ne'e hanesan ne'ebé, sira quase la compreende. Sira hola liman loos, de repente ema pára, sira corta de'it nem hatene ema husi kotuk mai ka la mai. Então precisa tau atenção máxima ba ida-ne'e, karik processo ida atu hasai carta condução ne'e mak la tuir nia procedimento loloos para hetan carta condição karik, precisa haree. Karik kona-ba *lampu merah* sira-ne'e dala ruma momento bá *test* ne'e ema balu mak preenche de'it mak sira hetan de'it carta condição karik precisa haree ida para sira bele compreende. Ba ita-nia semáforo sira ne'ebé monta iha fatin-fatin ne'e sira tem que compreende e hatene utiliza, tanba ida-ne'e dificulta tebes ba ema seluk ninia vida, e ema bele la lakon vida iha situação ida-ne'e.

E ikusliu, ha'u secunda ho Deputado Boraluli ninia ponto de ordem ida ohin, Excelência Presidente Parlamento, iha buat balu ne'ebé Presidente bele hatán mai, hatán mai! Maibé karik dirige ba Governo, coitado, ita-nia Vice-Ministro tuur tiha iha-ne'e orsida nia hamriik la'o tiha de'it, nia la bele hatán buat ruma, tanba Presidente hatán hotu tiha ona iha leten. Ne'ebe, ha'u sublinha de'it ida-ne'e.

Obrigado.

Sr.^a **Presidente**: — Ha'u agradece ba correção, mas uluk Ita-Boot mós nonook. Ne'ebe, agora fica calado! Está bem?

Deputado husi Bancada CNRT sira hamnasa.

Viola regras, tem que prega multa. Prega multa Deputado hakilar, ne'e mak complicado.

Tuirmai, iha pedido ponto de ordem husi, Sr. Deputado «Deker». Halo favor.

Mas labele halo pergunta.

Sr. **Domingos Augusto «Deker»** (CNRT): — Obrigado ba oportunidade.

Respeito ba Presidente Parlamento Nacional, composição da Mesa, distinta Deputada e distinto Deputado sira.

Ha'u hakarak husu ponto de ordem ne'e atu, primeiro, ha'u hato'o preocupação ida liga ba Ministério de Defesa, projeto uma ba F-FDTL iha Atabae Damlara, desde tinan kotuk parado, ne'ebé S. Ex.^a...

Sr.^a **Presidente**: — Deputado, não pode fazer intervenções! Ita-Boot bele rai ba relatório Comissão B nian. Ne'ebé, ha'u husu desculpa tanba taka tiha ona, Sr. Deputado.

Sr. **Domingos Augusto «Deker»** (CNRT): — Ponto de ordem tuirmai ne'e ha'u atu ko'alia uitoan kona-ba ohin distinta Deputada Olinda questiona, kona-ba ko'a osan veterano ne'e ilegal. Ha'u

hakarak hatete iha-ne'e katak osan veterano 30 USD ne'ebé ko'a ne'e la'ós ilegal, ne'e processo socialização ida naruk no boot, quase besik tinan ida hale'u Timor-Leste tomak, na'in hotu-hotu concorda mak foin ko'a, tanba ne'e la'os ilegal.

Agora, tuirmai ko'alia kona-ba problemas ne'ebé...

Sr.^a **Presidente**: — Tempo acabou, Sr. Deputado, um minuto. Ne'ebe, labele halo intervenção. Ha'u husu desculpa, está bem? Tanba kona-ba veteranos, ita hein membro do Governo mai, ministro competente, iha Orçamento Retificativo mak husik bá sira hatán. Ne'ebe, Sr. Deputado ha'u husu desculpa, bele taka microfone, ha'u sei la fó, Ita-Boot nia tempo hotu ona.

Ha'u husu desculpa, mas não pode intervir iha ponto de ordem! Fó explicação, sim! Mas iha período ida-ne'ebá.

Tuirmai, ha'u fó ba Bancada KHUNTO ne'ebé ohin hato'o declaração política. Halo favor.

Sr. **Luís Roberto da Silva** (KHUNTO): — Obrigado, Sr.^a Presidente Parlamento Nacional.

Ha'u hakarak fundamenta tan declaração política ida ohin dadeer-saan ninian ne'e, katak mundo global ida agora ne'e, era digital, buat hotu moderno. Ha'u hakarak husu ba cidadão hotu-hotu atu respeita nafatin, tau nafatin interesse ba buat cultura iha fuan, lisan iha fuan ho respeito malu. Selae ema dehan hanesan ne'e: *semakin lama dunia semakin moderen, semakin lama manusia juga salah gunakan media sosial*. Ida-ne'e mak dala barak ema ko'alia. Tanba ne'e mak, Timor ne'e kesi ita ho cultura, precisa respeita malu. Ki'ik sira respeita malu to'o ba ita-nia liderança sira, e husu mós ba Parlamento ida-ne'e, ita hamutuk ho Governo halo nu'usá para cria lailais lei cibernética... halo nu'usá?...

Lian husi Deputado balu: — *Cybercrime!*

Sr. **Luís Roberto da Silva** (KHUNTO): — ... *cybercrime* ne'e para bele halo atuação ba ita-nia ema sira ne'ebé halo intervenção iha mídia social la ho responsabilidade, la educativo, tanba sira-ne'e *seolah-olah* considera sira-nia an ne'e la moris husi inan ida aman ida, e considera ema seluk ne'e beik hotu de'it, sira mak matenek de'it. Ne'ebe, la hatene mídia mak beik mak ne'e ka, ou ema ida be hakerek mak beik aat liu mós ita la hatene, ne'e precisa lei para hodi halo proteção ba ida-ne'e.

Obrigado, Sr.^a Presidente.

Sr.^a **Presidente**: — Muitíssimo obrigada.

Ikusliu ha'u sei fó ba Sr. Vice-Ministro dos Assuntos Parlamentares, sobre as questões suscitadas pelos Srs. Deputados. Halo favor, tempo Ita-Boot nian.

Sr. **Vice-Ministro dos Assuntos Parlamentares** (Adérito Hugo da Costa): — Obrigado, Sr.ª Presidente Parlamento.

Membro da Mesa, distinta no distinto Deputado sira hotu, boa tarde.

Antes ha'u fó resposta ba pergunta balu que ha'u bele fó kedas resposta, quando sira seluk sei hein halo andamento ba ministério tutela sira ne'ebé atu fó resposta, iha documento rua ha'u adianta ba Excelência sira hotu para acompanha, inteira.

IX Governo, depois de posse iha dia 1 de julho to'ó ohin loron, dia 31, – Parlamento aprova ona ho unanimidade programa IX Governo Constitucional nian ba próximo cinco anos – agora duni Governo prepara hela Orçamento Retificativo, iha tempo badak, la liu to'ó dia 10 de agosto, bele halo submissão mai Parlamento.

Enquanto Governo prepara hela Orçamento Retificativo, iha semana liubá, iha dia 27 ho 28, iha documento rua que importante para continua fó andamento ba mandato IX Governo nian, liuhusi publicação *Jornal da República*, Série n.º 27A, 28 de julho de 2023, Orgânica IX Governo Constitucional ninian. Ha'u espera Sr. Deputado sira iha acesso ba documento ida-ne'e iha portal.

Ao mesmo tempo iha mós publicação *Jornal da República* Série n.º 26B, dia 25 de julho de 2023, relativa ho título husi Governante sira-ne'ebé simu posse iha dia 1 de julho, iha correção balu, e através de *Jornal da República* nian halo retificação ba título membro Governo sira ne'ebé sira iha. Exemplo, iha dia 1 de julho de 2023, iha ministro balu ho título Ministro Petróleo de'it, la iha Minerais e ho republicação ne'e completa fali título sira-nian iha *Jornal da República* ida iha início.

Portanto, ida-ne'e mak ha'u hakarak hato'o.

Ho promulgação Lei Orgânica IX Governo nian iha dia 28 ne'ebé tama ba efetividade, implementação, depois de um dia de publicação iha *Jornal da República*, Governo ka Executivo ne'e iha ona competência tomak atu começa executa serbisu sira iha terreno.

Ida-ne'e ha'u hakarak hato'o kedas mós ba Excelência sira hotu, Sr. Deputado sira, tanba iha Orgânica IX Governo ninian mós prevê assunto sira liga ho cargos de chefia, contratado sira-ne'e hotu, ne'ebé iha iha Governo anterior ninian, ho entrada em vigor IX Governo ninia orgânica, cargo de chefia sira, nomeação sira hotu ne'e aguarda de'it processo atu iha substituição. Quando sira hein hela processo substituição, sira nafatin iha cargo ne'ebé sira chefia para depois hein sira-nia substituição. Ne'e mak inclui iha decreto IX Governo nian.

Ida-ne'e ha'u antecipada kedas para depois ita labele hakfodak, labele iha surpresa liga ho questão mudanças cargo chefia sira ne'ebé sei introduz através competência própria IX Governo ninian.

Assunto seluk, liga ho Orgânica IX Governo ninian. Durante tomada de posse IX Governo nian, ami iha limitações de intervenções iha terreno liga ho normalização ba estradas no pontes afeta husi desastres naturais.

Ho situação atual, ho IX Governo nina estatuto orgânico nian, bele iha ona possibilidade para depois halo intervenção sira imediata iha terreno quando iha dificuldade ka iha problema.

Ha'u fó exemplo: Última semana tolu, liga ho normalização estrada e ponte nian, ami barak liu depende ba agência IGEADI (Instituto de Gestão de Equipamentos e Apoio ao Desenvolvimento de Infraestruturas), equipamento pesado sira ne'ebé iha e sira-nia equipamento mós la barak, então tan ne'e mak ami-nia intervenção iha terreno ladún lais tanba depende ba ne'e. Ami la hetan autorização ou seidauk iha autorização atubele indica setor privado sira atu ajuda halo normalização ba intervenção sira ho carácter emergência to'o ohin leron.

Espera katak questão sira ohin Sr. Deputado sira ko'alia, kona-ba normalização estradas, pontes e mota ne'ebé iha, ho acontecimento último, liga ho IX Governo nia orgânica, ha'u espera katak governante sira iha ministérios competentes bele halo ona intervenção ba assunto sira-ne'ebé emergente.

Questão seluk, liga ho assunto ida ohin ou semana kotuk mós Sr.^a Deputada Nina Rangel ho Sr.^a Deputada Olinda foti, kona-ba assunto contribuição 30 USD por mês husi veterano sira, beneficiário sira, ami sei halo andamento ba Assuntos Veteranos nian para bele explica detalha. Mas, ha'u hatene katak ba assunto ida-ne'e, ida primeira intervenção semana kotuk, ministério fó ona resposta balu. Ha'u espera katak documento resposta husi Ministério dos Assuntos dos Combatentes da Libertação Nacional iha mesa ona, mas se la iha, atu inclui mós ho saida mak Deputada Olinda foti para depois bele fó resposta imediata mai Sr. Deputado sira hotu.

Kona-ba taxa, assunto ida importante tebetebes, ami discute, e Governo nia parte, tanba liga ho elaboração Orçamento Retificativo 2023 nian, liga mós ho saida mak ohin Sr. Deputado Bianco foti, cenário saida mak inclui iha proposta Orçamento Retificativo 2023 nian iha rua: inclui alterações ba Lei Enquadramento Orçamental ou sem inclui alteração ba Enquadramento Orçamental. E ha'u la bele adianta opção saida mak iha, maibé elaboração em progresso, iha tempo badak Governo submete mai Parlamento Nacional lori hatene cenário saida mak Governo apresenta iha contexto ida-ne'e. Ne'e atu fó resposta ba ohin saida mak Sr. Deputado sira foti liga ho cenário apresentação Orçamento Retificativo ho nia carácter continuação orçamento 2023 nian, ho cenário preparação apresentação orçamento 2024 nian. Governo iha opção lubuk ida liga ho assunto ida-ne'e, liga ho compromisso ne'ebé IX Governo apresenta ona desde tomada de posse, através de S. Ex.^a Primeiro-Ministro.

Kona-ba questão Sr.^a Deputada Sância nian, Sr. Deputado Natalino no Sr. Deputado Firmínio, ne'ebé foti liga ho gestão sira iha Oe-Cusse, resposta kona-ba APS nian, detalhadamente, Sr. Presidente Autoridade, ha'u assina ona nia resposta mai iha Parlamento. Ha'u espera Sr. Deputado sira iha acesso ona ba documento resposta concreta mai husi Sr. Presidente Autoridade, liga ho questão lubuk ida, inclui recrutamento ho carácter estágio ba APS sira ne'ebé iha progresso último leron hirak

liubá, hanesan ohin Sr. Deputado Natalino foti, katak sira destaca ona ba iha edifício sira, mas nafatin, explicação detalhada Sr. Presidente Autoridade hatete claro iha carta resposta escrita.

Kona-ba taxa, assunto ida importante tebes ohin Sr. Deputado sira foti, Sr. Deputado sira hotu, Governo sei apresenta nia política concreta liga ho taxa ne'ebé acontece. Discussão naruk tebetebes, público foti kona-ba oinsá mak sasán folin sa'e, inflação ida demasiado iha último dois ou três meses. Governo sei mai ho nia cenário rasik, inclui saida mak ohin Sr.^a Deputada Cristina foti sobre obrigação ita hotu nian, Estado nian ka Governo nian atu haree ba controlo liuhusi agência apropriado sira hanesan AIFAESA, I.P. lori haree oinsá ema halo branqueamento capital ba sira-ne'ebé koko atu halo especulação preço sasán nian tanba lei existe.

Segundo, Governo mós bele mai ho nia política atu haree fali legislação sira em vigor liga ho política hasa'e taxa ninian. Bele acontece iha curto prazo através de orçamento rectificativo 2023, ou bele mós mais concreta, detalhada liután, barak liután iha orçamento 2024. Portanto, iha tempo badak Governo sei fó resposta concreta ba questão ida halo gestão oinsá ita enfrenta questão inflação ne'ebé iha.

Consideração mós Governo halo ba ita-nia porto Tibar, consideração mós atividade *loading* ka *unloading* iha porto Tibar ne'ebé tendência sasán sira mai la'ós iha fali porto Tibar, mas iha fali porto Atambua nian, para depois através de carreta sira pesado lori sasán tama mai Timor. Governo tau atenção hela ba movimento sira-ne'e, acontecimento sira-ne'e, para depois atu fó resposta concreta, liuhusi prevenção para depois ema hotu mai mercado ne'e tem que mai mercado Timor nian ne'e liuhusi porto ne'ebé apropriado Estado nian, para depois halo cobrança ba taxa.

Governo mós tau atenção séria ba gestão iha fronteiras terrestres Mota-Ain, Mota-Masin, atu haree questão gestão fronteira para la bele, saida mak Governo acompanha, iha tendência aumento atividade ilegal sira iha fronteira. Depois ita entra ba tinan foun janeiro de 2023 nian ho taxa ne'ebé sa'e, ita haree mós katak iha seriedade ida para haree gestão de fronteira para previne ema ultrapassa fronteira ilegal e halai sees husi obrigação atu selu taxa.

Assunto ida seluk, ohin Sr. Deputado Mandati no mós Sr. Deputado lubuk ida ko'alia, kona-ba assunto presença força nian ho atributo militar, farda sira, iha casamento ka iha festa, ami sei halo andamento ba Sr. Ministro Defesa para depois fó resposta, inclui regras disciplinares ne'ebé introduz ona husi Ministério Defesa ba Força Defesa, ba PNTL, tanba regra disciplinar estabelece desde reforma Defesa e Segurança iha 2008 ho di'ak tebetebes, e questão mak implementação e consistência ba implementação regra disciplinar sira ba ato sira pessoal ou grupo militar ou polícia ne'ebé comete erro sira indisciplinar ninian.

Kona-ba jogo, ohin Sr. Deputado Kalohan foti kona-ba atu regulariza jogo sira iha município, se ita haree didi'ak, iha programa IX Governo nian ko'alia claro sobre questão ida-ne'e. Governo sei mai ho nia ação concreta, programa concreta, para fó resposta ba meio sira mais adequado, mais

representativo hanesan Estado ida, oinsá ita atu regula atividade jogo sira iha ita-nia Rain. Se ita hakarak jogo ida mais elevado ona, di'ak liu sa'e ba elevado do que ita halimar ida classe *bahasa indonesia* dehan *kelas pinggiran* sira. Ema hatene hela ita envolve iha jogo, mas ita lakohi hatudu dehan ita joga. Então, se ita sério, ita eleva sira-nia nível ne'e ba nível ida alto, mais organizado, controlado, para ema joga iha fatin ho espaço ne'ebé mais adequado, mais apropriado do que ba joga iha fatin sira-ne'ebé jogo sira loke ho simples, investimento ida mai loke jogo sira besik ba povo tun to'o ba iha base, husi Díli to'o ba iha base. Governo sei mai kedas ho nia programa concreta para haree assunto ida-ne'e ho sério.

Portanto, Sr.^a Presidente Parlamento, ha'u fó resposta de'it ba assunto sira-ne'ebé ha'u sente ha'u bele fó resposta agora, maibé assunto sira seluk que Sr. Deputado sira foti, ha'u sei envia ba ministério tutela sira imediata para depois fó resposta iha próxima semana.

Ha'u mós fó-hanoin ona ba membro do Governo sira seluk atu fó atenção ba correspondência ne'ebé sai husi Gabinete dos Assuntos Parlamentar nian, husi Sr. Deputado sira hotu ba Sr. Ministro sira no Ministra sira, membro do Governo sira atu fó resposta imediata.

Ha'u husu desculpa karik iha resposta ne'ebé mai ona balu tau naran la loos, ha'u sei halo hela correção ba assunto correspondência sira-ne'e para depois bele halo ita-nia comunicação mais efetiva, mais eficaz, la iha *birokrasi*, lais liu para depois Sr. Deputado sira-nia perguntas ka assunto ne'ebé foti bele hetan lailais resposta imediata.

Ha'u hanoin, ida-ne'e de'it mak ha'u bele hato'o, Sr.^a Presidente Parlamento, ha'u entrega fali tampo ba Ita-Boot.

Sr.^a Presidente: — Muito obrigado, Sr. Vice-Ministro.

Molok ha'u atu tama ba Período da Ordem do Dia, ne'ebé anúncio de'it, ha'u hakarak frisa liután ida ohin kona-ba orçamentação por programa, Sr.^a Deputada Cedelízia Presidente da Comissão C hato'o ona, maibé iha Lei Enquadramento Orçamental ita permite *virement* 100%, ne'ebé contraditório, lei ne'e sei hadi'a, e ha'u concorda ho ida-ne'e.

Ida Sr. António Verdial Ferreira nian, liga ho cigarro ilegal, loos duni, Sr. Deputado, *East Timor Trading* mai hato'o iha-ne'e, ita contribui taxa iha Indonésia, tanba ema sira mai fa'an cigarro ne'e agora malorek loos. Iha retalho ne'e mak sira fa'an, e la subar, agora malorek, ne'ebe sira contribui taxa, ita contribui taxa ba país ne'ebé cigarro ne'e mai. E é muito complicado, ita haluha tiha bainhira hasa'e taxa cigarro, ita controlo la di'ak, ne'ebe cigarro sira-ne'e tama ilegalmente, ita contribui ba receitas fiscais ba país de origem.

Ne'ebe, dala ida tan, ita espera katak iha futuro, bainhira ita foti decisão, ita tem que controla duni, se la controla muito complicado.

Ikusliu, tanba ida-ne'e anúncio, ha'u atu fó-hanoin de'it, Srs. Deputados, liuliu ba bancada sira katak eleição ita marca ba dia 14 de agosto de 2023, ba Conselho Superior de Defesa e Segurança no mós Conselho de Estado. Ne'ebe, ami sei fó prazo final ba Plenária dia 7 nian mais tardar para fó sira-nia naran, nune'e mós acompanhado ho *curriculum vitae* ba sira-ne'ebé candidato e respetiva declaração de aceitação dos candidatos, ne'ebé sei apresenta ba assunto rua ne'e hotu, Conselho do Estado ho Conselho de Segurança.

Ne'ebe, dala ida tan ha'u husu tanba Presidente da República mós husu ona, nia la bele halo reunião ho conselho rua ne'e tanba seidauk renova. Hodi nune'e, dala ida tan, ho respeito tomak, husu ba Ita-Boot sira, se bele, hato'o ho antecedência tuir prazo ne'ebé hato'o ona iha-ne'e.

Hodi nune'e ha'u agradece ita bele termina ita-nia sessão plenária ohin nian 13h00, ita bá almoça, e Sr. Deputados, ha'u atu fó hatene katak, aban tanba la iha assunto Período da Ordem do Dia, ne'ebe ita espera katak ita bele halo serbisu hein Orçamento Retificativo mai ou assunto seluk ne'ebe urgente.

Muitíssimo obrigado.

Boa tarde, que tenham continuação de um bom dia.

Horas hatudu tuku 13h00.